

摘藻堂四庫全書薈要

史部

欽定四庫全書薈要

史部

御批續資治通鑑綱目卷十

詳校官編修臣汪鏞



欽定四庫全書薈要卷七千三百九十五

史部

御批續資治通鑑綱目卷十

起乙未宋徽宗政和五年
盡乙巳宋徽宗宣和七年
凡十一年

五年春正月女真完顏阿古達稱帝國號金



古達既屢勝遼其弟烏奇邁率將佐勸其稱帝阿
古達不許鄂蘭哈瑪爾普家努尼瑪哈復以為言阿
古達遂于正月朔即皇帝位且曰遼以賓鐵為號取其
堅也賓鐵雖堅終亦變壞惟金不變不壞金之色白
完顏色尚白况所居在安春水之上于是國號大金
改元收國更名旻以烏奇邁為安班貝勒薩哈舍音
為古倫貝勒其國語謂金為安春謂尊大為安班謂
國相為古倫舍音亦阿古達弟薩哈阿庫納之孫也

發明

稱者不宜稱也是故不宜王而王則書稱王不宜帝而帝則書稱帝稱皇帝綱目所謹者

中外之辨于阿古達雖書稱帝號金其後止以號舉僅進稱人於其卒也斥名而書死至二世烏奇邁始進而稱主以其漸染華風故耳此春秋待吳楚君之例也春秋吳楚止以州舉外之也今綱目于女真亦以號舉者蓋以春秋待吳楚諸國者例之所以立內外之防也然則金之強盛已見後十餘年漸啟侵伐之謀矣此又君子之所深懼也

廣義

抑觀阿古達起自海上其志不小故其所得成就焉彼其背遼之初衆勸其稱帝乃曰何

示人之不廣也衆又勸之復不許衆迫之且曰吾將思之然則其視草寇之得一隅獲一勝而遂稱尊僭號者大不侔矣其興也不亦宜乎

晏州夷叛以趙適為瀘南招討使平之

知梅嶺皆高公老之妻宗女也嘗出金玉器飲晏州夷酋卜漏等漏心艷之會瀘帥賈宗諒以斂竹木擾夷部且誣致其酋卜固謗等罪夷人咸怨漏遂相結因上元張燈襲破梅嶺皆擄公老妻及其器物四出剽掠梓州轉運使趙適聞之倍道趨瀘劾宗諒罷之詔康延魯代宗諒聽適節制適陰有專討意兵端益大于是詔發陝西軍三萬以適為招討使適與別駕馬覺張思正分道出期會于晏州漏據輪縛大囤其山崛起數百仞林箐深密諸村因夷為適敗潰者悉赴之乃壘石樹柵以守適軍不能進巡檢种友直所部多思黔土丁習山險而山多狽適遣土丁捕之伐去蒙密緣崩石挽藤葛而上得狽數十頭東麻作炬灌以膏蠟縛于狽背暮夜復遣土丁負繩梯登崖巔乃絙梯引下人人銜枚挈狽蟻附而上比雞鳴友直

等悉力擁刀斧穿箐入及賊柵出火燃炬猱熱狂跳
賊廬舍皆茅竹猱竄其上火輒發賊號呼奔撲猱益
驚火益熾官軍鼓譟破柵賊擾亂不復能抗赴火墮
崖死者不可勝計斬數千人生擒一漏晏州平拓地
千里通為建城砦畫疆畝募
人耕種且習戰守號曰勝兵

遼遣使如金議和金不從

遼主使僧嘉努持書往金議和使為屬國阿古達遣
薩喇復書云若歸叛人阿蘇遷黃龍府于別地然後
議之

廣義

方是時也乃遼主怠忽荒政之日正金主卧
薪嘗膽之秋遼弱金強蓋可知矣夫何遼主

視為蕞爾小國遣使持書既名曰和又使為屬
國果何義哉宜其倔强不服而反有倨傲之辭

金擊遼兵于達魯噶城大敗之

金主自將攻遼黃龍府進薄益州州人走保黃龍金取其餘民而去遼遣都統鄂爾多左副統蕭伊蘇右副統耶律章嘉努都監蕭色佛呼將騎二十萬步卒七萬戍邊且屯田以為長久計金主聞之率衆趨達魯噶城登高望遼兵若連雲灌木狀顧謂左右曰遼兵心貳而情怯雖多不足畏遂趨高阜為陣摩羅歡以右翼先馳遼左軍左軍却羅索尼楚赫衝遼中堅陷陣力戰尼瑪哈以中軍助之遼兵遂敗金兵乘勝追躡至其營會日已暮圍之黎明遼軍潰圍出金人遂北至阿魯岡遼步卒盡殫耕具數千皆為金人所獲是役也遼人本欲屯田且戰且守故併其耕具皆失之

廣義

嗚呼金主可謂知兵者矣觀其謂左右曰遼主雖衆心貳而情怯不足畏也則其胸中自

有定見而勝負先決于此不待羅索尼楚赫尼瑪哈摩羅歡等斬敵陷陣而後知也議者不可謂敵人無

熙河將劉法敗夏人于古庫勒

童貫遣熙河經畧使劉法將步騎十五萬出湟州秦鳳經畧使劉仲武將兵五萬出會州貫以中軍駐蘭州為兩路聲援仲武至清水河築城屯守而還法與夏右廂軍戰于古庫勒大敗之斬首三千餘

發明

說道而勝之曰敗譏黠武也王者之兵禁暴誅亂今夏人未聞犯邊而遽興大衆較勝遠

夷方且居驕臣諂粉飾太平謂之何哉故綱目于諸將伐夏皆曰攻曰克曰敗所以貶之也合前後書法觀之見綱目貴義不貴功之深意耳

廣義

春秋傳說道勝之曰敗夏人雖戎出兵征之要在有名堂堂中國而以說道勝夏人不足

也取

二月立定王桓為皇太子赦

桓帝長子顯
恭皇后所生

廣義

王者建儲即擇端人正士以為師傅講明格致誠正之學以為修齊治平之本則後日必

無多欲之累吾知土木之功不興禱祀之非不作能去奢侈能絕玩好百度惟貞百志惟熙而宗社有所托生民有所仰矣今以是年二月立太子三四年間未間求一賢人輔導青宮至宣和元年纔得一楊龜山亦不過為秘書郎而不曾使其左右太子也其故何哉蓋由徽宗平素厭正人妬正學

背正道故也厥後父子如金蓋有由矣

以童貫領六路邊事

時永興廊延環慶秦鳳涇原熙河各置經畧安撫司以貫總領之于是西兵之柄皆屬于貫

三月遼遣使諭金降

遼主使章嘉努等六人齎書使金猶斤阿古達名冀其降金主以為書辭慢侮畱五人獨遣章嘉努還報書亦斥遼主名諭遼主降

廣義

遼主嘗使耶律僧嘉努如金議和金主不從反得其倨傲之辭况師屢出而屢為其挫衄

豈不知其為勍敵又使使諭降哉其報書斥辱也宜矣于時遼主自當內修德政外睦鄰國選將用

賢降詔罪已輯邊陲謹斥堆回顧國中無有不善
彼必為之聽命矣今也舍已之田而耘人之田宜
乎自己甫田之荒穢而功亦不及于他人之
畝畝也故曰國必自伐而後人伐之信哉

夏六月作三山河橋

蔡京以孟昌齡為都水使者鑿大岷三山兩河創天
成聖功二橋調役夫數十萬民不聊生至是畢工未
幾水漲橋壞

廣義

書曰不作無益害有益功乃成今當鄰國侮
慢之秋正當君臣協力修舉政教改經易轍

而以號令天下可也不知作此河橋與夫前之王清
陽和延福等宮果何益哉分注曰調役夫數萬民
不聊生嗚呼譬猶百圍之木膏液
內涸然後風可得而拔也哀哉

遼復遣使如金金人執之

金主以書辭慢留
遼使蕭薩喇不遣

廣義

遼主嘗遣使如金議和得其倨傲之辭再遣使如金諭降致其斥名之辱今也猶不知省

又使使持謾書以往宜乎使之被執而不遣也子貢曰多見其不知量也其遼主之謂乎

秋七月朔日食○八月作明堂

初元豐禮官以明堂寓大慶殿別請建立以盡嚴奉而未暇講求至是下詔內出圖式宣示于崇政殿且以明堂宜正臨丙方近東以據福德之地乃從秘書省于宣德門東而以省地營之命蔡京為明堂使開局興工日役萬人

發明

作不宜作也三山明堂非大事而必書之者見役民為重也國之所寶者民民之所重者

食前作三山調役夫數十萬民不聊生此作明堂開局興工日役萬人況六月八月亦農事方殷之時興作如此則傷民之力闕民之食為可見矣人君愛民如子恤其饑寒救其疾苦而用民之力歲不過三日安有三月之間兩興大役民其可得安生乎大抵節儉之君惟恐民之弗逸奢侈之君惟恐民之有逸每相反而已矣文王惠鮮鰥寡懷保小民詎若是之作無益哉絕民之君天必絕之他日之亂其及救乎故備書以深譏之

廣義

夫明堂者王者發號施令之所王政之所由出者也今徽宗作此明堂無一善政之出則

孰若不作之為愈也雖曰美之實貶之也豈愛禮存羊之意哉

遼伐金

遼主下詔親征女真率蕃漢兵十餘萬出長春路命蕭奉先為御營都統耶律章努副之以精兵二萬為先鋒餘分五部北出駱駝口別以漢步騎三萬南出寧江州發數月糧期必滅女真

廣義

金雖倔強遼之屬國也然屢無禮于遼宜遼之聲罪致討焉綱目大書于冊正名定罪也

有星流出于柳

其光照地色赤黃有尾占者以為天子宗廟有喜國家建造宮室之祥祭京率百官表賀

發明

凡書有者所未嘗有者也星流出柳其光照地變異莫甚于此矣蓋示變而警天心之自

然遇變而懼君心之當然宋之君臣未間更相戒飭圖惟修已而且以為天子宗廟有喜國家建造

宮室之祥蔡京鄙夫率官表賀嗚呼小人之蒙蔽其君可勝言哉是時徽宗失德無益繼作其宮室之建靡有休息而蔡京等不能引君當道顧乃長君之惡狐媚狼貪苟焉無恥必正之以春秋之法京其誅首殿綱目特筆于冊其義蓋可見矣

廣義

嗚呼朝廷興土木之工而勞民傷財其不祥莫大焉蔡京反率百官為賀其欺天罔人也

孰甚

安置太子詹事陳邦光于池州

蔡京獻太子以大食國琉璃酒器羅列宮庭太子怒曰天子大臣不問以道義相訓乃持玩好之具蕩吾志耶命左右碎之京聞邦光實激太子諷言者擊逐之

發明

有事是君為容悅者有以安社稷為悅者何則懼容悅之小人有以妄悅而病吾君之心也

君心勤政彼病之以逸豫君心憂亂彼病之以宴樂君心裕民彼病之以聚斂君心靜治彼病之以威武是皆小人之故態耳蔡京以琉璃酒器獻納東宮之中太子不悅遂命撞碎蔡京歸罪邦光羅織竄逐光何罪邪蓋由小人之心惟以得君為念意豈不曰天子既被蠱惑繼天子而主天下者太子也苟不預為賄賂他時何以容身故先進玩好以要結之不惟病君之心亦且固君之寵所以其謀不成而遂忌邦光也吁

小人之不利君國信矣

九月金取遼黃龍府

金主攻黃龍府次混同江無舟可渡金主使一人導前乘楫白馬徑涉曰視吾鞭所指而行諸軍隨之以

濟遂克黃龍府遣蕭薩喇還遼
曰若歸我叛人阿蘇即當班師

廣義

大抵國之所以興者雖曰人為實惟天耳然則栽培傾覆天豈以中外異哉分注載金主

渡混同江之事其亦可怪也夫嗚呼光武信滹沱河水之堅金主藐混同江水之淺同一機耳噫滹沱之水混同之水天耶人耶天也

遼軍渡混同江副都統耶律章努作亂伏誅

遼師渡混同江副都統章努與耶律淳妃弟蕭迪里及其甥蕭延畱等謀迎立淳誘將士亡歸上京遣迪里以其謀告淳淳曰此非細事主上自有諸王當立比南面大臣不來而汝言及此何也密令左右拘之有頃遼主使行宮實達爾伊遜等持書至言章努之謀淳即斬迪里等携其首單騎詣廣平淀待罪遼主

遇之如初章努知諄不見聽乃率麾下掠取上京府庫財物至祖州帥其黨告太祖廟數遼主罪惡移檄州縣遂結勅海羣盜至數萬趨廣平犯行宮不能克率衆北走順國女真阿固齊以三百騎一戰勝之擒其貴族二百餘人並斬以徇餘得脫者皆奔女真章努詐為使者欲奔女真為邏者所獲縛送行在要斬于市

廣義

悲夫遼主之渡混同也勅敵迫之親戚畔之譬諸虓羸之人而又加以寒疾不汗其能保

有厥躬乎綱目大書而備載分注者所以正即律章努之罪以見遼事之不濟也

王厚等攻夏臧底河城敗績夏人遂大掠蕭關

厚與劉仲武合涇原鄜延環慶秦鳳之師攻夏臧底河城敗績死者十四五秦鳳第三將全軍萬人皆沒

厚懼重賂童貫匿不以聞
未幾夏人大掠蕭關而去

發明

王厚攻城不克失律喪師未聞有詰責之舉
夏人大掠蕭關縱其出入未聞有備禦之謀

則宋人玩法弛備之情可見矣欲其不亂
蓋亦難焉此綱目微顯闡幽之深意也

冬十二月金襲遼軍于呼卜圖岡大敗之

金主間遼出軍務面仰天慟哭曰始與汝等起兵蓋
苦契丹殘忍欲自立國今天祚親至奈何非人死戰
莫能當也不若殺我一族汝等迎降轉禍為福諸軍
皆曰事已至此唯命是從金主遂帥師迎敵遼主自
將至駝門駙馬蕭特默等將騎兵五萬步卒四十萬
至鳴琳灤金主行至約羅與其臣謀曰遼兵號七十
萬其鋒不可當吾軍遠來人馬疲乏宜駐于此深溝
高壘以待之會復遼督餉者知遼主以章努反西還

己二日矣諸將請乘急擊之遂追遼主及于呼卜圖岡金主曰彼衆我寡兵不可分視其中軍最堅遼主必在焉敗其中軍可以得志使右翼先戰左翼合而攻之遼兵大潰枕藉相屬百餘里獲輿輦帶幄兵械軍資他寶物馬牛不可勝紀蕭特默焚營而遁金主亦引退

廣義

是役也遼主無章努之叛則遼金勝負未可知矣孟子曰寡助之至親戚畔之其遼主之

謂乎

丙申六年春正月遼將高永昌據遼陽以叛

遼東京留守蕭保先嚴酷渤海苦之正月朔夜半有惡少年十餘乘酒執刀踰垣入府刺殺保先戶部使大公鼎聞亂即攝留守事與副留守高清明集奚漢兵千人盡捕斬之撫定其民裨將渤海高永昌時以

兵三千屯八甌口見遼政日衰金兵方強遂誘渤海并戊卒入遼陽據之旬日之間遠近響應有兵八千人因借號稱隆基元年遼主遣蕭罕嘉努張琳討之

發明

永昌之入遼陽也而直書曰叛何也人臣當國家蹇難之時則必公爾忘私國爾忘家委置其身可也夫何見遼日衰遂懷異志乃據遼陽改元僭號則其罪之暴白亦不可掩矣故直書據遼陽以叛據者不順之詞叛者不赦之罪其與春秋書晉趙鞅入于晉陽以叛同意學者宜併觀之

賜方士林靈素號通真達靈先生

靈素温州人少從浮屠苦其師笞罵去為道士善妖幻往來淮泗間丐食僧寺僧寺苦之及王元志死王仔昔寵哀帝訪方士于左階道錄徐知常知常以靈素對即召見靈素大言曰天有九霄而神霄為最高

其治曰府神霄玉清王者上帝之長子主南方號稱長生大帝君陛下是也既下降于世其弟號青華帝君者主東方攝領之又有仙官八百餘名今蔡京即左元仙伯王黼即文華使鄭居中童貫等皆有名而已即仙卿褚慧下降佐帝君之治時劉貴妃方有寵靈素以為九華玉真安妃帝心獨喜其事甚加寵信賜號通真達靈先生賞賚無算為改溫州為應道軍靈素本無所能惟稍習五雷法召呼風霆間禱雨有小已驗而

發明

人君之德莫大乎明能明則不明弗能蔽矣莫大乎正能正則不正者弗能間矣靈素乃

邪柔鄙夫以妖術惑人誠清朝之所必誅而不貸者也徽宗因徐知常之薦召對賜號寵錫尤隆可醜之甚徽宗自即位以來賢人君子未聞召用而方士小人信無虛日豈不深可惜哉靈素市井無賴

之徒初無驚世駭俗之行抑不知通何之真達何之靈乎直書于冊其失自見

廣義

考之分注靈素本無他能惟駕一通空虛誑誕之辭以聲替徽宗之耳目其無羞惡之尤

者也夫何徽宗悅其無微之獎即加無算之賜其昏愚孰甚焉嗚呼信虛無者莫甚于徽宗羅慘禍者亦莫甚于徽宗後世人君有崇信虛無者尚鑒于茲

以童貫為陝西兩河宣撫使○劉法攻夏日木多泉城屠之

童貫使劉法劉仲武合熙秦之師十萬攻夏日木多泉城城中力守援不至乃降法受而屠之

發明

兵者禁暴誅亂之名不可不用而又不可輕用童貫擅開邊釁與夏構兵闖右之民困于

鋒鏑其禍慘矣劉法等方且阿諛苟容頗指氣使故不曰伐而曰攻敗之之詞也迨夫既克其城即肆屠戮是乃爭城以戰殺人盈城抑豈得為王者之師耶他日戰于統安身且不保然則窮兵黷武者果何益哉時天下益疲外患疊至而宋之君臣未聞內修外攘之策顧乃溺于宴安養成禍亂謂之得計可乎直書曰屠所以著其暴也

渭州將种師道克夏賊底河城

師道世衡之孫也

閏月立道學

從林靈素之言也尋詔太學辟雍各置內經道德經莊列博士二員又用蔡京言集古今道教事為紀志

賜名
道史

廣義

嗚呼玉石不可以相用薰蕕不可以同處奪
朱亂雅君子惡之今也徽宗攻乎異端之極
不惜吾道之害獨不觀夫白圭不以蠅矢而玷太
清不以纖雲而翳雖使異端雜于吾道之中然于
吾道固無所損而徽宗則徒
貽萬年之臭也此舉陋哉

二月作上清寶籙宮成

帝間林靈素之言于景龍門對晨暉門作上清寶籙
宮密連禁署宮中山包平地環以佳木清流列諸館
舍臺閣多以美材為楹棟不施五采有自然之勝上
下立亭宇不可勝計帝時登皇城下視之由是開景
龍門城上作複道通寶
籙宮以便齋醮之事

發明

作不宜作者然宮殿書作于是月成于是月者譏速費也徽宗惑林靈素之言立道學作

寶錄兩月之間二事並舉國家大政廢而不恤勞民傷財無時休息自古繼世之君未始不成于戒謹而敗于逸豫也於乎內作色荒外作禽荒甘酒嗜音峻宇雕牆有一于此未或不亡徽宗皆兼而有之雖欲不亡烏可得乎是以古之人君當以繫于苞桑為戒人臣當以畏天板蕩為勉此所以常保其泰而無顛危之失也

廣義

大抵禁者人君燕息之所深宮固門閣寺守之何等嚴密雖親王不得涉其境者別嫌疑

也此日碑所以不惜其子而傷于忿歟若使外人得以出入其中惡在其為宮禁哉觀分注之所載則知徽宗之志荒矣

夏四月金人攻高永昌殺之遂取遼東京州縣

永昌使人求援于金且曰願併力以取遼金主使呼
實布謂永昌曰同力取遼固可東京近地汝輒據之
以僭大號則不可若能歸款當授王爵永昌不從金
主乃遣幹魯帥諸軍攻永昌時遼張琳等討永昌久
不克幹魯與戰敗之遂取瀋州永昌大懼率衆拒金
遇于活水金師既濟永昌之軍不戰而却遂北至遼
陽城下明日永昌盡帥其衆與金戰又大敗遂以五
千騎奔長松遼陽人托卜嘉執永昌以獻金主殺之
于是遼之東京州縣及南路繫遼女真皆降于
金金主以幹魯為百路都統沃稜知東京事

發明

攻者自相搏擊之詞殺者殺非其罪之詞取
者收奪之名皆所以貶之也然永昌既據遼

陽悖君叛國乃亂賊耳曷為不書討書誅而書攻
書殺耶蓋阿古達之叛君猶高永昌之叛國不過

以賊攻賊不以討賊之例予金也况金之攻永昌是乃利其土地非能倡義而討之者故下書曰遂取遼東京州縣則其義亦可見矣

廣義

高永昌遼之叛臣也納叛春秋惡之觀金主謂永昌曰同力取遼固可東京近地汝輒據

之以僭大號則不可若能歸款當授王爵斯言也何其正大之若是哉及其殺永昌得東京即除遼法省賦稅其與中國之興者無異孔子曰夷狄之有君不如諸夏之亡也信哉

何執中罷

執中輔政一紀年高疾甚賜之寬告尋以太傅就第朝朔望儀物廩稍一如居位時未幾卒執中嘗為端王侍講故始終恩遇不替然無所建明惟以謹畏迎順主意贊飾太平而已

詔蔡京三日一朝總治三省事

京改都堂為公相廳詔
京總治三省正公相位

五月以鄭居中為少保太宰劉正夫為少宰鄧洵武知樞密院事

時蔡京大興工役民不聊生變亂法度吏無所師鄭居中每為帝言帝亦惡京專乃拜居中太宰使伺察之人以正夫議論數與京異拜為少宰居中存紀綱守格令抑僥倖振淹滯士論翕然望治

六月遼以耶律淳為都元帥○秋八月以侯蒙為中書侍郎薛昂為尚書左丞○九月帝詣玉清和陽宮上玉

帝徽號赦

帝奉玉冊玉寶如玉清和陽宮上玉帝尊號曰太上
開天執符御歷含真體道昊天玉皇上帝詔天下洞
天福地脩建宮觀塑造聖像又上地祇徽號曰承天
效法厚德光太后土皇地祇上寶冊儀禮一如上帝
尋改宮名為玉清神霄宮又鑄神霄
九鼎安置于上清寶籙宮之神霄殿

發明

凡天子所臨曰幸尊之之詞也前史皆書幸
和陽綱目變文曰詣所以譏徽宗崇尚虛無

故貶而卑之也蔡京大興工役民不聊生變亂法
度吏無所師則其肇亂之基莫甚于此徽宗弗為
之懼而乃溺信無稽崇飾虛禮易曰帝出乎震
傳曰帝者天之主宰其尊無對詎必加以徽號云
乎獲罪于天無所禱也徽宗所為若此而殊無一
毫省已之心使或疲民而奉天天其為我祐之哉

凡不再貶而其義
自見者此類是也

廣義

傳曰以理言之謂之天以主宰言之謂之帝
帝焉而非理焉能主宰即天與帝非有二也

一理而已故字書加一字于大字之上此所謂其
尊無對者也世之庸夫愚婦不諳乎此往往以為
有一袞冕丈夫號為玉皇大帝據于青天之上崇
奉之則降福消災不然則獲罪戾殊不知凡百所
為合理則福違理則禍書曰作善降之百祥作不
善降之百殃然謂之降者非從上降下之降皆本
于吾心自有之天善惡一萌禍福隨之以其合在
天之天故有若降之然也苟如世俗之論動作不
必合理但崇奉玉帝自能獲福若然則為盜為奸
之徒亦嘗設齋誦經崇奉矣而終必敗露死于桎
梏非命者何也此可見上天無私非如世俗之所
謂也徽宗之于玉帝既加以美名又詔告天下則

其所以崇奉之者至矣盡矣不可以有加矣厥後
斥辱外庭號為昏德而死于沙漠者何玉帝之不
仁而不一青盼也綱目書此誠足以發千古之笑
臣故廣此義以俟談理者評之

冬十月以白時中為尚書右丞○夏人寇涇原屠靖夏

城

夏大舉攻涇原靖夏城時久無雪夏先使數萬騎繞
城踐塵漲天乃潛穿壕為地道入城中城遂陷屠之
而去

發明

寇者賊之也屠者暴之也前書劉法屠日本多
泉城此書夏人屠靖夏城遞相報復無時休

息率土地食人肉其禍慘矣其罪甚矣然非夏之
跋扈乃宋之自取也安在窮兵啓釁而可以為王

者之師乎綱目特書于冊
以為後世憤兵之戒耳

十二月劉正夫罷

正夫在相位能迎時上下持祿養
權至是以開府儀同三司致仕

廣義

分注載正夫在相位能迎時上下持祿養權
至是以開府儀同三司致仕觀此則知正夫
之行其異于馮道者幾希矣豈有身為宰執
而素行若此哉綱目所以削其官者鄙之也

茂州夷內附置壽寧延寧軍

丁酉七年春二月大理入貢

廣州觀察使黃隣誘大理入貢詔以其
主段和譽為雲南節度使封大理國王

帝幸上清寶籙宮命林靈素講道經

時道士皆有俸每一觀給田亦不下數百千頃凡設大齋輒費緡錢數萬貧下之人多買青布幅巾以赴日得一飮餐而襯施錢三百謂之千道會且令士庶入聽靈素講經帝為設幄其側靈素據高座使人于下再拜請問然所言無殊絕者時時雜以滑稽媒語上下為大闕笑莫有君臣之禮復令吏民詣宮投神霄秘籙朝士嗜進者亦靡然趨之

發明

是時天下雖平然小人猖獗天下陵夷此正憤恥自強之時而君臣相與從事虛無何哉

蓋祭京王黼之為相而童貫為之將三人皆佞道者也太學不幸而幸寶籙國政不講而講道經未幾邊警侵迫敵至則罷講敵退則仍前甚至冊為教主道君皇帝帝言天神降于坤寧殿紛紛交舉

政和之政日以紊矣特書屢書不一書而止皆所以深貶之也其與唐書置百萬座講仁王經同意

夏四月道錄院上章冊帝為教主道君皇帝

帝諷道錄院曰朕乃上帝元子為太霄帝君憫中華被金狄之教遂懇上帝願為人主令天下歸于正道卿等可冊帝為教主道君皇帝于是道錄院上表冊之然止于道教章疏內用

發明

迷而後悟者謂之中人以下迷而不悟者謂之下愚不移徽宗酷信虛無舉措失義可愧

之甚焉冊者上封下之詞以臣而冊君其禮安乎以天子為道君其義正乎徽宗敦尚道教貶抑佛法不過一偏之見耳非謂之至言也善乎劉文安公定之曰佛本西域之人而其徒謂佛之身體面貌皆若金色徽宗所謂中華被金狄之教指佛教而言也然其言可謂妄矣未幾女真起自遼海建

號大金旆據中華斯言若為之先兆也唐僖宗紀元為廣明是時黃巢初起曰唐去君而存黃以為廣此黃當代唐之徵後之論者謂天記昏主以告亡于世徽宗之言豈不類此噫以文安公之言驗諸書法參諸分注為益信矣是故傳曰善必先知之不善必先知之綱目特書于冊所以深譏之爾

廣義

分注載徽宗詠道錄院曰朕乃上帝元子為太霄帝君閔中華被金狄之教遂懇上帝願

為人主今天下歸于正道卿等可上表章冊朕為教主道君皇帝于是羣臣及道錄院上表冊然止用于教門章疏內而不施于政事其亦惡無理也嗚呼徽宗此舉可謂無恥之甚矣設此誑誕之語以欺人吾誰欺欺天乎況人君為民物之主凡有冊命皆出于君非君則不敢專也今異端者流反得冊一至尊其諸謂之何哉其意不過欲愚夷人俾其知畏上帝不敢無禮于我故也殊不知金人

淳樸之風尚多于徽宗矣孔子曰夷狄之有君不如諸夏之亡也厥後父子同歿于外則是反受金人之教而不知自己所主之教果安在哉闢異端尊中國儒者之事也世變一至于此可哀也

六月明堂成○秋七月置提舉御前人船所

時東南監司郡官二廣市舶率有應奉又有不待旨但送物至都計會官者以獻大率靈壁太湖慈溪武康諸石二浙奇竹異花海錯福建荔枝橄欖龍眼南海椰實登萊文石湖湘文竹四川佳果木皆越海度江毀橋梁鑿城郭而至植之皆生而異味珍苞則以健步捷走雖甚遠數日即達色香未變也至是蔡京又言陛下無聲色犬馬之奉所尚者山林間物乃人之所棄但有司奉行之過因以致擾願節其浮濫乃請作提舉淮浙人船所命內侍鄧文誥領之詔自後有所用即從御前降下乃如數貢餘不許妄進意欲

以便民而實
擾害如故

發明

孟子曰禹湯文武以仁得之桀紂幽厲以不仁失之然則天下之存亡在仁不仁之間耳

徽宗窮奢極欲不恤國政無益繼作斂怨四海天下其岌岌矣詩曰天之方蹶無然泄泄而蔡京諸臣不能盡心匡救而乃阿諛苟容是時東南監司大為民害既知其弊宜當速蠲而蔡京小人方欲節其浮濫嗚呼陋矣雖置人船擾害如故果何益哉故綱目直書以著其失

熙河環慶涇原地震

旬日不止壞城壁
廬舍壓死者甚衆

發明

楊氏萬里曰和氣致祥乖氣致異是二氣之相應猶桴鼓也和氣者政平訟簡興賢育才

是也乖氣者反是是故和氣亢溢而祥瑞生乖氣
亢塞而災異見熙河環慶涇原乃隣夏之地而徽
宗內不修德用兵西夏今而地震旬日不止得非
此之應歟徽宗方且溺于虛無恕不之懼謂之何
哉綱目不言事應而事應具存所以曉後世之
人君遇災而懼之意也夫豈無故而書之耶

八月鄭居中罷

居中與蔡京不相能至是以母喪去位京以居中王
珪婿也乃使蔡確子懋重理定策事遂追封確清源
郡王御製文立石墓前欲借是
撼居中然卒不能害懋即渭也

遼置怨軍

遼主自燕至陰涼河募遼東人為兵使報怨于女真
號曰怨軍凡八營屯衛州蒺藜山以渤海鐵州人郭

藥師等

為帥

冬十月侯蒙罷

蔡京惡之也

十一月命蔡京五日起都堂治事

發明

王衍未用識者知其必壞蒼生後用之而為

晉禍盧杞未用識者恐其他日之得志後用之而為唐害信乎小人不可不防之于其始是故履霜之警恐其堅也取女之戒懼其壯也童牛之桔防其盛也金柅之繫止于進也無非拒絕于未進之時如舜之誅四凶成王之誅管蔡是也蔡京敗壞天下盡惑君心不能正明其罪而乃屢加寵渥謂之何哉前書詔蔡京三日一朝總治三省事

此書命蔡京五日一赴都堂治事何若是之尊崇乎吁若徽宗者知有蔡京而不知有天下目一書再書深貶之也

○起復鄭居中為太宰以余深為少宰白時中為中書侍郎十二月以薛昂為門下侍郎○方士王仔昔下獄死

仔昔倨傲而顙帝待以客禮故遇宦侍若童奴又欲羣道士皆宗已林靈素忌之乃與宦者馮浩誣以言語怨望下獄死

廣義

分注載靈素忌仔昔與宦者馮浩誣以言語怨望下獄死今綱目所書有若徽宗殺之者何

蓋生殺人主之大權
昔得罪于徽宗故也

有星如月南行

發明

西晉之末五星互經天縱橫無常唐末星交
流如織今此有星如月南行可謂變異之甚

矣然當時君臣未聞有恐懼修省之意故自是而
後兵禍滋熾宇縣分裂生民屠戮幾盡歷二十餘
年而後止綱目大書
于冊天戒豈不明哉

○帝言天神降于坤寧殿詔示百官

帝感于林靈素之言建宮觀徧天下又造青華帝君
正晝臨壇及火龍神劍夜降內宮之事託天神臨降
造帝誥天書雲篆務以惑世欺衆其說妄誕不可究
質宦者道士有所不快必託為帝誥則莫不如志尋

加靈素號通真達靈元妙先生張虛白通元冲妙先生視中大夫出入訶引至與諸王爭道都人稱曰道家兩府其徒美衣玉食者幾二萬人

發明

古先聖王之治天下恒守正道罔敢怠忽不作無稽不為非禮故能永保天命而無傾危

也易曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也徽宗安而忘危存而忘亡治而忘亂乃下愚耳蓋天者理而已矣凡陰陽之屈伸者謂之鬼神鬼神之道二氣之良能也豈有形像之可觀如徽宗所云者嗚呼君者孟也臣者水也孟方則水方孟圓則水圓徽宗自欺如此安有人不我欺乎哉前書帝以天神降詔百官此帝言天神降皆所以深譏之耳

廣義

嗚呼王言如絲其出如綸書曰大哉王言由是知詔者人君以言而詔告天下者也然謂

之王言非大公至正者不可以教乎人今徽宗以怪誕不經之言而詔天下則是黃屋中居一浪說之人耳尚何以君人乎哉

以童貫領樞密院事

內侍自古無賜坐者時貫加開府儀同三司領樞密院每春秋大燕則坐于執政之上日與宰相同班進呈畢即自屏後入內復易窄衫與羣閣為伍出則為大臣當體貌之禮入則為近侍執使令之役古所未有也

作萬歲山

初帝以未得嗣子為念道士劉混康以法籙符水出入禁中言京師西北隅地協堪輿倘形勢加以稍高當有多男之祥始命為數仞岡阜已而後宮生子漸多帝甚喜始信道教于是蔡攸倡為異聞謂有珠星壁月跨鳳乘龍天符雲篆之符以逢迎之遂竭國力以經營土木之工至是又命戶部侍郎孟揆于上清寶籙宮東築山以像餘杭之鳳凰山號曰萬歲

發明

作不宜作也徽宗視民財猶瓦礫輕民命猶草芥謂之守成之君可乎昔商民所大病者

其政貪散財發粟之令一下而四海服秦民所大病者其政酷約法三章之令一下而萬民悅周漢之興無非以得民心而興商秦之亡無非以失民心而亡徽宗惑蔡攸之狂言興土木之大役於戲民之財力有限國之興作無窮雖日夜之所息雨露之所長尚弗克濟况財力非草木之可比乎若

徽宗誠可謂寄生之君
目特書于冊深惡之也

竄侍御史黃棟光于昭州

初棟光為左司諫始莅職即言三省吏猥多乞非元
豐舊制者一切革去帝命釐正之一時士論翕然蔡
京怒其異已密白帝降內批云當豐享豫大之時為
哀亂減省之計從為符寶郎明年復拜侍御史至是
大旱帝以為念棟光上疏言蔡京強悍自專侈大過
制無君臣之分鄭居中余深依違畏避不能任天下
之責故致此異疏上不報京權勢震赫舉朝結
舌棟光獨出力攻之京懼中以他事竄之昭州

發明

楊氏曰君不自任則大惟不自任其智而兼
衆智是以大其智故曰智臨大君之宜二帝

三王之聖一也舜曰大舜禹曰大禹好問拜昌言
而已徽宗即位以來忠諫之臣貶斥殆盡當時以

言為諱無敢倡者孫光力劾蔡京遂為竄逐則是
自任其智而無可為之勢明矣自古人君未有閉
塞言路而能致治者此徽宗所以終于危亡而不
採也直書竄而不去其官則其說不待辨說而自
明矣

廣義

考之分注黃孫光言當時大旱由蔡京專權
之所致舉朝結舌而孫光獨力攻之其事不
異于鳳鳴朝陽也綱目樂道人之善故
于孫光之竄不惟銜之而又地之也

遼耶律淳及金將烏撈古戰于蒺藜山敗走金遂取遼
八州

遼主命淳會四路兵馬防秋淳遺金咸州都統烏撈
古書議和烏撈古告于金主金主猶以歸薩喇及阿

蘇為言淳軍至蕤藜山烏楞古及知東京事沃梭等
進攻顯州遼怨軍帥郭藥師乘夜襲走之烏楞古遂
與淳戰淳敗走烏楞古追至額勒錦陂遂拔
顯州于是乾懿豪徽成川惠七州皆降金

金遣使求封冊于遼

遼東鐵州人楊朴言于金主曰自古英雄開國必先
求大國封冊金主從之使至遼時遼東諸州盜賊蜂
起掠民以充食樞密使
蕭奉先等勸遼主許之

廣義

金主求封于遼遼亦許其所求可謂兩得矣
此即淮陰求王于齊之計耳雖欲不許不可

也得也

戊戌重和元年春正月作定命寶成

于闐上美王踰二尺帝命制寶文曰範圍天地幽贊
神明保合太和萬壽無疆篆以魚蟲制作之工幾于
秦璽號曰定命寶合前八寶為九寶以定命為首且
曰八寶者國之神器至于定命乃我所自制也寶成
帝御殿受
賀肆赦

發明

古之人君不戒懼于蹇難之時而戒懼于豐
亨之日驕生于安儉生于危故也吳氏曰自

處于危者乃自安保位之道也漂乎若將亂者乃
所以常保其存常有其治也蓋于久安存治之時
而能不忘危亡亂之禍是以身之位得以安而國
家可保其久存長治也徽宗無益繼作愈肆驕吝
每以秦政漢武為法噫其志亦陋矣他時客死異
國天下紛擾命何可定寶何可補耶綱目一書再
書不一而足皆
所以深貶之爾

廣義

書曰天難謀命靡常常厥德保厥位由是知欲定天命顧人君之德何如耳非由一玉璽

也是以成湯能顧諟明命以卜商世于六百文王知峻命不易以卜周世于八百考之前史未聞湯武仗玉璽而延長有如此者厥後召公之告成王曰王厥有成命治民今休蓋言成王能繼天出治則庶幾天有一定之命而治民今即休美矣亦未聞召公之貴玉璽也惟呂政得一玉為璽欲傳之萬世僅二世而亡後世人主何不察此動以秦璽為慕今徽宗得玉製寶其文曰範圍天地幽贊鬼神保合太和萬壽無疆篆以魚蟲製作之工幾于秦璽號曰定命寶鳴呼秦皇父子尚得死于國中徽宗父子則殞身異域又秦皇父子之不若也孰謂天之定命乃在玉而不在德也哉

以王黼為尚書左丞

黼美風姿有口辯寡學術而多智善佞初以何執中
薦累官左司諫張商英為相寢失帝意帝遣使以玉
環賜蔡京于杭黼塊知之因數條奏京所行政事並擊
商英及京復相德其助已歲中三遷為御史中丞黼
欲京專國遂疏執中二十罪已而改翰林學士會京
與鄭居中不合黼復內交居中京由是怨之徙為戶
部尚書將陷以罪黼以計復
免還為學士承旨遂入政府

二月遣武義大夫馬政浮海使金約夾攻遼

建隆中女真嘗自其國之蘇州泛海至登州賣馬故
道猶存至今有漢人高藥師者泛海來言女真建國
屢破遼師登州守臣王師中以間詔蔡京童貫共議
命師中募人同藥師等齎市馬詔以往不能達而還
帝乃復委童貫遣人使之遂使武義大夫馬政同藥
師由海道如金致言于金主曰主上間貴朝攻破契

丹五十餘城欲與通好共行弔伐若
允許後當遣使來議通金好自此始

發明

不曰伐而曰攻明遼之無罪著宋之黷武也
禁暴誅亂王者盛心救災卹鄰中國善政是

時女真叛遼憑陵沙漠誠王法之所必禁天子不
能舉弔伐之師四隣不能有救援之義而反利人
土地約攻契丹是乃助桀無道耳魯公會戎春秋
所恥曾謂中國天子而乃與外邦共功耶建隆二
年女真入貢是外邦求通于中國也重和元年馬
政使金是中國求通于外邦也厥後遼亡未幾宋
亦不保果何益哉綱目書
此亦謹始慮終之戒云

廣義

分注云通金好自此始
臣謂與金讐亦自此始

夏五月朔日食○秋七月以鄭居中為少傅余深為少

保○八月以童貫為太保○九月掖庭大火

自甲夜達曉大雨如傾火益熾凡蒸五千餘間苑後廣聖宮及宮人所居幾盡焚死者甚衆

發明

嘗觀天變之應速緩不一應之速者如此書以重貫為太保而下書掖庭大火元書封已

延為秦王是日秦州山崩地裂之類是也有應之緩者如王安石創立新法而三司火用兵西夏熙河環慶涇原地震之類是也楊誠齋曰夫闕寺為患從古有之惟信之愈深則為害愈烈南司之臣可傾而北司之勢終敗甘露之禍可免而鳳翔之變難逃漢鼎一移而曹節安在唐祚不振季述亦亡所謂信之愈深則為害愈烈者蓋以此也童貫閣人以為太保果何謂哉下書掖庭大火則天怒之意為可知矣徽宗迷而不悟悲夫

薛昂罷以白時中王黼為門下中書侍郎馮熙載范致
虛為尚書左右丞○鄭居中罷

居中乞持餘
服詔許之

廣義

居中此罷得矣綱目何不書
其官惡其依違畏避蔡京也

閏月立周恭帝後

詔周柴氏後已封崇義公復立恭帝後
以為宣義郎監周陵廟世世為國三恪

冬十二月置裕民局尋罷之○遼大饑人相食

發明

凡外災告則書不曰饑而曰大饑言甚也人
相食則尤甚目遼既罹兵難重以饑饉則其

業亦殆矣遼之窮迫從可知焉自古天子有救災
卹鄰之義宋未救卹反欲攻之豈不悖哉綱目特
書于冊所以志
遼亡國之本

己亥宣和元年春正月詔更寺院為宮觀

林靈素欲盡廢釋氏以逞前憾請于帝改佛號大覺
金仙餘為仙人道士僧為德士易服飾稱姓氏寺為
宮院為觀改女冠為女道尼為女德
尋詔德士並許入道學依道士之法

發明

前書以林靈素為通真達靈先生此書詔更
寺院為宮觀則其崇尚異端特有好惡偏私

之異耳非灼然明達不惑者也綱目特揭
而大書之則其是非得失瞭然見矣

廣義

嗚呼佛老之害人國也尚矣徽宗之世佛老
盛行而老氏之學尤為極甚今觀綱目具載

于以見林靈素肆意妄行絕無忌憚改僧名易寺院欲更即更無不如意徽宗乃其掌中之物徒擁虛器而已汴宋淪夷豈無自哉

金人來聘遣馬政報之不至而復

金主與尼瑪哈議遣渤海人李善慶女真索多持國書并北珠生金等物同馬政來脩好詔蔡京等諭以夾攻遼之意善慶等唯唯居十餘日遣政同趙有開齎詔及禮物與善慶等渡海報聘行至登州有開死會謀者言遼已封金主為帝乃詔政勿行止遣平海軍校呼慶送善慶等歸金金主遣慶歸且語之曰歸見皇帝果欲結好早示國書若仍用詔決難行也初高麗來求醫帝命二醫往至是歸奏云高麗館醫甚勤日夕引之視其用兵布陣禦敵之方曰聞天子將與女真圖契丹苟存契丹猶足為中國捍邊女真

乃強敵不可交也宜早為之備帝聞之不樂

發明

金稱人進之也朝聘者中國諸侯之事雖外邦而能脩中國諸侯之事則不念其背遼不

臣而遂進焉雖然金之來聘由宋先通之也夏禹修德萬國來朝周公行政重譯來獻然當是時未聞禹周先通而後來之也徽宗善結強鄰以速土崩其志亦惜矣變文而書來聘者猶為中國諱之焉耳綱目揭而書之則興亡之機識者可以觀焉宜乎有以來高麗之諫也

以余深為太宰王黼為少宰

黼賜第城西日導以教坊樂供張什器悉取于官寵傾一時是時朝廷已納趙良嗣之計將會金以圖燕會謀云遼主有亡國之相黼薦畫學正陳堯臣使遼堯臣繪遼主像以歸言于帝曰遼主望之不似人君

若以相法言之亡在旦夕韋速進兵兼弱攻昧此其時也并圖其山川險易以上帝大喜取燕雲之計遂決

廣義

分注載王黼薦畫學正陳堯臣使遼繪遼主像以歸言于帝曰遼主望之不似人君若以

相法言之亡在旦夕韋速進兵兼弱攻昧此其時也帝大喜取燕雲之計遂決嗚呼武王興王之業十有八九商紂亡國之勢十有七八武王師臨牧野尚曰同力度德同德度義惟以德義為主其他非所先也宋之興遼迹其立國之初各逐其鹿亦非有不共戴天之仇特以澶淵一事為之介介耳今而一聽細人之言遂定取燕雲之策果何德何義哉彼天祚荒淫不道固有亡國之勢初不繫于相也昔煬帝自稱好頭頸終斫于宇文化及之手臣觀宋史載徽宗縱逸樂好奢侈必其儀容俊雅

其相優于遼主也多矣然而後世論亡國之君者莫不以徽宗為首稱何耶德義不修而料敵之失也故

占城入貢

占城在中國西南東至海西至雲南南至真臘一
程西北至交州四十日所統大小聚落一百五大畧
如州縣自上世未嘗通上國周顯德中始入貢其後
朝貢不絕然與交州相近互相侵擾焉至是封為王
始與交趾
加恩均矣

二月以鄧洵武為少保○三月以馮熙載為中書侍郎
范致虛張邦昌為尚書左右丞

發明

徽宗之世政出權姦觀其所用之人所行之事無一善之可取欲其不亂蓋亦難矣故綱

目特揭其執政之臣而歷書之所以著宋肇亂之始

○遼遣使冊金阿古達為東懷國皇帝阿古達不受

遼遣耶律努克如金議和金主復書曰能以兄事朕歲貢方物歸我中京上京興中府三路州縣以親王公主駙馬大臣子孫為質還我行人及元給信符并宋夏高麗往復書詔表牒則可既而努克至金使呼圖克昆與俱如遼免取質子及上京興中府所屬州郡裁減歲幣之數且曰必以兄事我冊用漢儀方可為約言如不從勿復遣使遼主從之凡七遣使如金議冊禮金乃使烏凌阿贊謨如遼迎封冊冊至金金主以無兄事之語又不稱大金而東懷乃小邦懷其德之義語涉輕侮乃復使贊謨如遼責其冊率體式如依

前書所定然
然後可從

廣義

遼人不道金人朶頤其鼎也久矣然其求封冊迎封冊皆偽也遼人不察乎此反以東懷

國皇帝冊之金人之意以為若是者則處我于一附庸也然且謂之懷者懷遼之義也遼主既以皇帝之名自居又以之冊金則是非不知天無二日民無二王也特畏其強而不得不以是冊之耳曰然則綱目于金主何以名之邪曰君前臣名之義也

劉法及夏人戰于統安城敗走夏人追殺之

童貫使劉法取朔方法不欲行彊遣之乃引兵二萬出至統安城遇夏主弟察克率步騎為三陣以當法前軍而別遣精騎登山出其後大戰移七時兵饑馬渴死者甚衆法乘夜遁比明走七十里至蓋朱峴守

兵追之斬首而去貫隱其敗而以捷聞察克見法首惻然語其下曰劉將軍前敗我于古庫勒日本多泉吾避其鋒謂天生神將豈料今為一小卒梟首哉其失在恃勝輕出不可不戒遂乘勝圍震武震武在山峽中熙秦兩路不能餉自築城三歲知軍李明孟清皆為夏人所殺至是城又將陷察克曰勿破此城留作南朝病魂乃自引去

發明

內書及則主是戰者劉法而曲在內矣不曰敗績而曰敗走敗絕之詞也追者已去而躡

之之謂劉法擅起邊釁兵連禍結其罪已甚故書夏人追殺易于匹夫然者所以罪其既率大軍不能死敵而先為苟免之計焉耳不然何以不書死之而書殺之乎觀綱目之所書則其貴義不貴功之意隱然見于

書法之間矣

廣義

童貫敗軍而無敢言者畏貫之兇殘也嗚呼徽宗倒持太阿而授之于貫其不斷指裂膚

者幾

希矣

夏四月朔日食○五月京師大水

京師茶肆傭農興見犬犬蹲榻傍近視之則龍也軍器作坊兵士取而食之逾五日大雨如注歷七日而止京城外水高十餘丈帝懼甚命戶部侍郎唐恪決水下流入五大河起居郎李綱言國家都汴百五十餘年矣未嘗有此異夫變不虛生必有感召之災非易禦必有消復之望求直言采而用之以答天戒詔賑綱一官與縣去

發明

日者衆陽之宗水者陰沴之發蓋日為陽而水為陰京師為陽而四方為陰君上為陽而

臣下為陰令而日食大水則是陽淑消而陰慝長
推原其義乃君道之虧而強敵小人竊發之機也
善乎李綱曰變不虛生必有感召之災非易禦必
有消復之當時視為泛常畧無戒懼然則玩安忽
危未有甚于徽宗者也天變曷從而弭
哉後之有天下之責者可不致謹乎斯

廣義

飛龍在天豈有踴榻之理然而俄致大水之
異者此強臣敵國禍亂之徵也可不戒哉

六月夏人來詔童貫罷兵秋七月以貫為太傅

闕右既困童貫諷夏人因遼進誓表納款遂詔六路
罷兵及夏遣使來賀天寧節授以誓詔夏使辭不取
貫不能屈但追館伴強之使持還及境棄之道中而
去賈炎得而上之貫始大沮尋加貫太傅封涇國公
時人稱蔡京為
公相貫為媼相

發明

直書曰來不予其朝也夏人之來初非心服特因闕右既困童貫諷之故耳及授詔書夏

使不肯持還及境棄之道中而為敵人輕侮如此則宋之不競從可知矣然太傅三公之職童貫何人而可當之乎矧兵連禍結迄無成功不能加誅而反行賞謂之何哉以至貴之爵授刑餘之人則是徽宗知有私恩而不知有名器也厥後女真入境童貫逃回則貫之才畧亦可想見矣比而觀之其義自見

廣義

刑餘奴隸之賤既處以師傅之尊復列以上公之爵不知匡贊治化與夫開國元勳將何

以處之邪嗚呼徽宗昏庸若此宜其不死社稷而甘心受辱焉

八月范致虛罷

時朝廷欲用師契丹致虛言邊釁一開必
有意外之患宰相謂其懷異會母喪去位

金製女真字

女真初無文字及獲契丹漢人始通契丹漢字金主
遂命古紳依倣漢人楷字因契丹字制度合本國語
製女真字行之後復製女真
小字謂古紳所製為大字云

九月辛蔡京第

帝幸道德院觀金芝遂幸蔡京第時京子攸儵備及
攸子行皆為大學士儼尚帝女茂德帝姬家人廝養
亦居大官滕妻封夫人京每侍上恒以君臣相悅為
言帝時乘輕車小輦頻幸其第命坐傳觴畧用家人
禮京謝表有云主婦上壽請酬而肯
從稚子牽衣挽留而不却蓋實事也

發明

按劉氏家法凡書君入諸臣之家皆譏詞也天子深居九重罔敢輕出况蔡京姦險柔佞

小人豈有謀焉則就之禮乎厥後遊幸無度往來市廛卒無忌憚馴至大亂而後已是故徽宗之放肆蔡京有以啓之也蔡京之恣橫徽宗有以成之也然則有天下者詎可不知所警哉直書幸第深愧之也

加蔡攸開府儀同三司

攸有寵于帝進見無時與王黼得預宮中秘戲或侍曲宴則攸黼着短衫窄袴塗抹青紅雜倡優侏儒中多道市井淫媒諠浪語以獻笑取悅攸妻宋氏出入禁掖攸子行領殿中監寵信傾其父攸嘗言于帝曰所謂人主當以四海為家太平為娛歲月能幾何豈徒自勞苦帝深納之因令苑園皆倣江浙為白屋不

施五米多為村居野店及聚珍禽異獸動數千百以實其中都下每秋風夜靜禽獸之聲四徹宛若山林陂澤之間識者以為不祥之兆

冬十月頒紹述熙豐政事書于天下○十一月以張邦昌王安中為尚書左右丞

安中附童貫王黼為中丞因論蔡京罪為帝所知遂居政府

十二月帝數微行竄秘書省正字曹輔于郴州

帝自政和以來多微行始民間猶未知及蔡京謝表輕車小輦七賜臨幸自是邸報傳之四方而臣僚阿順莫敢言曹輔上疏諫曰陛下厭居法宮時乘小輦出入塵陌郊垌極遊樂而後返臣不意陛下當宗社付託

之重玩安忽危一至于此夫君之與民本以人合合則為腹心離則為楚越畔服之際在于斯須甚可畏也萬一當乘輿不戒之初一夫不逞包藏禍心雖神靈垂護然亦損威傷重矣又况有臣子不忠言者可不戒哉帝得疏出示宰臣令赴都堂審問余深曰輔小官何敢論大事輔曰大官不言故小官言之王黼陽顧張邦昌王安中曰有是事乎皆應以不知輔曰茲事雖巷里小民無不知相公當國獨不知邪曾此不知焉用彼相黼怒令吏從輔受詞輔操筆曰區區之心一無所求愛君而已退待罪于家黼奏不重責輔無以息浮言遂編管柳州初輔將有言知必獲罪召子紳來付以家事乃閉戶草疏及貶怡然就道

發明

微行者匹夫之事自漢武微行而宋太祖效之太祖微行而徽宗又效之不惟行而曰數

甚言其無節也蓋貴為天子富有四海其出則警其入則蹕戒不虞也今乃輕車小輦浪遊塵陌間

遇不測其及救乎秘書正字官之卑者尚能力諫其非當時之羣臣誠有愧耳而余深王黼之徒方且曲為辨說竄逐郴州小人之蒙蔽其君有如是哉苟卿曰忠信而不諛諫諍而不諂矯然剛折端立而無傾側之心曹輔近之矣然綱目上書帝數微行下書竄曹輔則其義為可見

廣義

曹輔忠君愛國而反蒙竄逐則徽宗之縱欲拒諫具與楊廣陳叔寶一轍矣不亡得乎

召楊時為秘書郎

時南劍將樂人初舉進士第聞陳顥兄弟講孔孟絕學于河洛調官不赴以師禮見顥于潁昌相得甚歡其歸也顥目送之曰吾道南矣及顥卒又師事程頤于洛蓋年四十年矣一日頤偶瞑坐時與游酢侍立不去頤既覺則門外雪深一尺矣後厯知瀏陽餘杭蕭山三縣皆有惠政民思之不忘時安于州縣未嘗

求聞達而德望日重四方之士不遠千里從之游號曰龜山先生會蔡京客張巖言于京曰今天下多故事至此必敗宜急引舊德老成置諸左右庶幾猶可及京問其人巖以時對京因爲之會路允迪自高麗還言高麗國王問龜山先生安在乃召爲秘書郎

發明

自立黨禁小人盈朝天下否矣蔡京因張巖之言遂薦楊時召爲館閣是蓋天理民彝隨處發見不終泯沒云爾使其奮革前習鼎新事業悉訪賢才與之共政則天下容或未亂也惜乎徒能召時而不改故轍可勝憾哉

綱目書此亦所以不沒其善

廣義

龜山碩德重望英才正學雖夷裔之國尚尊慕之況中土耶夫何徽宗昧于求賢溺于私昵衆賢在野羣小滿朝今者一得龜山卽當置諸左右如尹如說則太甲高宗之事業不難矣既名

曰召止以為郎惜哉且蔡京之于賢人君子非不知不好也特以利欲之私蔽錮已深雖有賢聖在焉譬諸泰山峙目雷電轟耳而亦不見不聞也今而直抵無可奈何之地始以龜山為薦此可見小人之于天理未嘗有所泯滅也吁使龜山為郎固無所損使其為相亦無所益而宋之宗社幸與不幸實在于賢人君子之用與不用何如自有天下者可不戒哉

庚子二年春正月罷道學○林靈素有罪放歸田里

靈素初與道士王允誠共為神怪之事後忌其相軋毒殺允誠遂專用事及都城水帝遣靈素厭勝方步虛城上役夫爭舉槌將擊之走而免帝始厭之然橫恣愈不悛道遇皇太子弗欲避太子入訴于帝帝怒以靈素為太虛大夫斥還故里命江端本通判温州察之端本廉得其居處過制罪詔徙置楚州命下而

靈素已死遺奏至
猶以侍從禮葬焉

發明

靈素奸偽小人既號以通真達靈先生又寵錫無比蓋亦不愧之甚矣及其道遇太子亦

弗歛避乃始賤之不亦晚乎夫小人不足道也其如國法何哉書曰有罪放歸田里所以著徽宗之失而非予其能罰有罪也然帝于方士始雖為其所因及陷于罪則亦往往取而討之如王仔荀林靈素之類皆在所不赦是又帝之明斷也嗚呼茲其所以不沒其善也歟使推是心以治京黼則亦何往而不善哉惜乎尚明于他而獨暗于此耳

廣義

異端之害雖曰易以惑人實係乎時君世主之賢否也今焉無他事而遽罷之者必其見

侮于靈素多矣徽宗似難以語人者也故分注載靈素並肆橫恣道遇皇太子弗歛避太子訴于帝

帝怒以靈素斥還故里其意蓋可見矣嗚呼靈素肆侮于宋也甚矣雖使厥軀寸斬邪徒亟死猶不足以及謝天下今其死也反以禮葬則不惟失討賊之義而適以遂賊之計矣惜哉

二月遣趙良嗣使金

先是呼慶自金還具道金主言并持其書來請別遣使時童貫密受旨圖燕因建議遣右文殿修撰趙良嗣往仍以市馬為名其實約攻遼以取燕雲之地

○三月遼復遣使如金議冊禮金不許

先是遼遣蕭實訥持冊藁如金金遣烏凌阿贊謨持冊副本報遼遼以金所定大聖二字與先世稱號同遣實訥往議金主大怒謂其臣曰遼人屢敗遣使求成惟飾虛詞以為緩師之計當議進兵乃令咸州

路統軍司治軍旅修器械將以四月進師令色克留兵一千鎮守棟摩以餘兵來會于渾河和議遂絕

廣義

臣前所謂金之求冊者偽也今果以之而絕和議焉金人之計如是而遼人其可當乎

夏五月金侵遼上京留守耶律托卜嘉以城降

金主自將攻遼以遼使蕭實訥埒宋使趙良嗣從遣降者馬乙持詔諭城中使速降遼主獵于呼圖哩巴山間金舉兵命耶律拜薩巴等選精兵三千以濟師五月金主進攻且謂實訥埒趙良嗣曰汝可觀吾用兵以去就遂臨城督戰諸軍鼓譟而進自旦及巳棟摩以麾下先登克其外城留守托卜嘉以城降良嗣等奉觴為壽皆稱萬歲金主乃還

發明

潛師入境曰侵凡降譏也以城降甚譏之說范曰食其食者死其事受其祿者畢其能托

卜嘉為遼內族命以留守城非不堅兵非不多弗克死守而乃迎降其罪甚矣故大書曰以城降則見其上京之兵足以拒敵而托卜嘉偷生苟免則非力屈而降者比矣綱目書此以為後世人臣不忠之戒耳于托卜嘉乎何誅

六月詔蔡京致仕

京專政日久公論益不與帝益厭薄之子攸權勢既與父相軋浮薄者復間焉由是父子各立門戶遂為仇敵攸別居賜第一日詣京京正與客語使避之攸甫入遽起握父手為盼視狀曰大人脈勢舒緩體中得無有不過乎京曰無之攸曰禁中方有公事即辭去客竊窺見以問京京曰君固不解此邪此兒欲以為吾疾而罷我耳閱數日果以太師魯國公致仕仍朝朔望

發明

凡書致仕予知止也此予之歟曰非也致仕者人臣知止之稱詔其致仕則非知止者焉

分注言京專政日久公論不與帝亦厭薄况父子各立門戶遂為仇敵則是君臣父子之間慙德多矣語曰君不君臣不臣父不父子不子雖有粟吾得而食諸三綱既絕彞倫亦廢雖祿之以天下不能一朝居也惡在其能經綸天下宰正百官者哉直書詔致仕則貪位慕祿眷眷不舍之意可見矣

廣義

觀分注備載蔡京致仕之由其逆理違天莫有過于蔡京父子也今焉蔡京之子既叛其

父京獨不叛其君邪昔齊景公問政于孔子孔子曰君君臣臣父父子子曰善哉信如君不君臣不臣父不父子不子雖有粟吾得而食諸故後世莫不賢景公者以其篤信聖言而為政事之根本也今蔡京得君如此之專行乎國政如此其久攸為親子尚不能處而致其叛逆如此其于君臣也

何有哉徽宗不此之察而被其蠱惑是猶與豺狼
同處而望其馴于我也其不為伊吞啗者幾希矣

復僧寺額

尋又復德

士為僧

發明

徽宗惑于方士廢斥浮屠既而稍悟甫罪林
靈素等即復僧寺額皆不顧理之是否惟務

相反而已綱目合而
書之識者可以觀矣

廣義

嗚呼異端之害莫甚于僧與道也故有忿其
穢汚而除之者一見于元魏再見于五代之

周由東漢以迄于今舍此而未間如魏如周者焉
故程子曰昔之入人也乘其迷暗今之入人也因
其高明不其諒哉綱目前書罷道學放靈素君子
幸焉未幾而遂復僧寺額者譬諸一盜出而一盜

入也然欲保其貨貲之不失者
難矣哉宋室不競良可惜耳

秋八月金人來議攻遼及歲幣遣馬政報之

趙良嗣謂金主曰燕本漢地欲夾攻遼使金取中京
大定府宋取燕京析津府金主許之遂議歲幣金主
因以手札付趙良嗣約金兵自平地松林趨古北口
宋兵自白溝夾攻不然不能從因遣貝勒偕良嗣還
以致其言帝使馬政報聘書云大宋皇帝致書于大
金皇帝遠承示書致罰契丹當如來約已差童貫勒
兵相應彼此兵不得過

關歲幣之數同于遼

發明

金人無厭之求至是見矣其初議攻遼必及
歲幣則異時覬覦之欲詎可遏乎明哲之君

熟思審處審其來意必善絕之以防憑陵之患可
也惜乎徽宗利人土地駸駸不已不顧禮義屈已

要盟豈不深可歎哉是知謹始慮終謀國之善策
作事謀始應變之良規徽宗之通金由其不能謹
始所以未免慮終觀綱目之
所書可以占宋事之隆替矣

廣義

分注載徽宗致書于大金皇帝約共攻遼及
許歲幣與遼同者嗚呼宋瑒公不能正衛人

之罪而反糾之以伐無罪之鄭春秋惡之况遼素
通好于宋無罪可伐金為遼之屬國乃叛君者耳
金可伐而遼不可伐也明矣今反助之而與攻遼
何哉畏其強而俛首聽命焉耳正藝祖所謂吾平
生不欺善怕惡今其嗣孫乃怕惡欺善者也藝祖
曷得不興而嗣孫曷得不亡乎及許歲幣與遼同者
是乃踵弱國之末算其志不亦卑乎嗚呼漢以金
縉奉匈奴賈誼薄之慮患深也他日金人愈肆其
強指以歲幣為口實而索燕雲之租稅者此其驗
也曰然則事已如此為徽宗計者奈何曰遼雖弱

而不可攻金雖強而不能伐惟當致書絕皇帝之辭交隣無歲幣之許內脩德政外輯邊疆禮賢士用良將俟其有過然後傳詔天下徐興問罪之師蔑不勝矣何金之可畏哉若曰金果脩德而如湯如武我誠有所不建必如孟子所謂鑿池築城與民守之是也舍此而求他計末之難矣抑觀徽宗此舉其失有三助強鄰而伐無罪之國不仁也敵人而與之盟不義也許夷人以歲幣不智也失此三者國本搖矣可不慮哉

以余深為少傅○冬十月朔日食○加內侍梁師成太尉

師成點慧習文法初領詹思殿文字外庫主出外傳上旨政和中漸得幸因竄名進士籍內累遷至河東節度使遂加太尉時帝留意禮文符瑞之事師成善逢迎希恩寵帝命處殿中凡御書號令皆出具手多

擇善書吏習倣帝書雜詔旨以出外庭莫能辨師成實不能文而高自標榜自言蘇軾出于時天下禁誦蘇文其尺牘在人間者皆毀去師成訴于帝曰先臣何罪自是軾之文乃稍出以翰墨為已任四方儒秀名士必招致門下往往遭點污多置書畫卷軸于外舍邀賓客縱觀得其題識合意者輒密加汲引執政侍從可階而升王黼以父事之稱為恩府先生蔡京父子亦諂附焉都人目為隱相所領職局至數十百階至開府儀同三司布衣朱夢說上書論官寺權太重詔編管于池州

發明

凡書加不宜加也太尉三公之職內侍刑餘小人以三公之職加刑餘小人此徽宗所以

瀆亂名器也嗚呼宋室宦者之禍相尋于無窮烏得而不亂哉是時亂根尚在而代者已踵其後故書加梁師成太尉則是一童貫未去一童貫已生矣禍亂果何時而弭乎吁其與唐書以程元振為

驃騎大將

軍同意

廣義

觀分注載師成之言則知其點慧無能出其右者也。不能書而竊御書以重其權不能文而竊蘇文以鈞其譽彼徽宗特其掌中之木偶耳其亦可笑也哉。

睦州人方臘作亂

睦州清溪民方臘世居縣場村託左道以惑衆初唐永徽中睦州女子陳碩真反自稱文佳皇帝故其地相傳有天子基臘因得憑藉以自信縣境梓桐幫源諸洞皆落山谷幽險處民物繁夥有漆楮杉材之饒富商巨賈多往來臘有漆園造作局屢酷取之臘怒而未敢發時吳中困于朱勔花石之擾比屋致怨太學生鄧肅進詩諷諫帝不聽放肅歸田里勔益橫臘因民不忍陰聚貧乏遊手之徒以朱勔為名起作亂自號

聖公建元永樂置官吏將帥以巾飾為別自紅巾而上凡六等無弓矢介冑惟以鬼神詭秘事相扇誅焚室廬掠金帛子女誘脇良民為兵人安于太平不識金革聞金鼓聲即斂手聽命不旬日聚眾至數萬兩浙都監蔡遵顏坦擊之皆敗死于息坑

發明

嗚呼宋室自此亂矣方臘作亂自往年萌孽至是始書于策臘雖破滅已而宋江金人侵伐之謀接踵而起宋遂不支儻以徽欽昏淫相繼為亡宋之主則方臘之亂實起于重和初年是時徽宗失德既彰禍已若此然則逆氣所鍾妖孽乘之尚復何說之有哉下書陷睦欽杭州陷婺處州陷衢州寇秀州如入無人之境然則花石之害民其流之弊至是甚矣識者可以察之後之有天下者可不

戒諸

廣義

分注載朱勔花石之擾比屋致怨臘因民不

而非君則何所奉戴是知君民一體可相有而不
可相無者也民可恃乎哉恐觀往古得窺神器者
何莫不自因民不怨中來耶是故后羿因民不怨
而得距太康于河此五子之所以悲也自時厥後
成湯因夏民不怨而桀有南巢之放武王因商民
不怨而紂有牧野之誅漢高因民不怨而嬴氏以
亡光武因民不怨而新莽以滅民不怨于陳后主
之侈而楊堅興于隋民不怨于隋煬帝之驕而世
民王于唐今徽宗之民不怨于朱勔故方臘得以
因之也但臘以下愚之見而不能成弔伐之舉耳
且諫君之道具來尚矣堯舜大禹聖人也亦有都
俞吁咈勸戒之辭迨至湯武從諫如流而商周以
興桀紂拒諫歸罪夏商以亡漢魏以下其興其亡
無不然矣彼鄧肅以詩諷諫深得古人之意所謂

吟咏性情以諷其上言之者不可罪聞之者足以
戒是也故康公慢賢而權輿是作陳佗無良而墓
門以興他如簡兮之諷衛侯巧言之刺幽王是皆
臣子愛君之意此所以見取于聖人也由是知諷
諫者古人之遺意罪諫者國君之不祥今鄧肅朝
進諷諫之詩暮承放歸之詔于以見微宗拒諫之
心素所橫于胸中雖以陳司諫之落裾尚遭其貶
况肅之無官守者邪綱目備載于分注所以著微
宗罪諫之惡而識
其亡國之大端也

十一月余深罷

時福建以取花果擾民深
為言之帝不悅出知福州

以王黼為少保太宰

初蔡京致仕黼陽順人心悉反其所為四方翕然稱
為賢相及拜太宰遂乘高為邪多蓄子女玉帛自奉
僭擬禁省
稍襲京迹

十二月方臘陷睦歙杭州詔以童貫為江淮荆浙宣撫 使發兵討之

臘攻陷清溪遂陷睦歙杭州東南將郭師中戰死遂北
掠桐廬富陽諸縣進逼杭州郡守趙霆棄城走州即
陷殺制置使陳建廉訪使趙約縱火六日死者不可
勝計凡得官吏必斷脛支體探其肺腸或焚以膏油
叢鐺亂射備盡楚毒以償怨心警奏至京師時方聚
兵以圖北伐王黼匿不以聞于是凶焰日熾附者益
衆東南大震淮南發運使陳邁上言臘衆強東南兵
弱乞調京畿兵及鼎澧槍牌手兼程以來使不至滋

蔓帝得疏始大驚乃罷北伐之議而以童貫為宣撫使譚稹為兩浙制置使率禁旅及秦晉番漢兵十五萬討之

真臘入貢

真臘在占城南地方七千里政和中始通中國至是遣郎將來朝詔封其主金哀賓深為國王恩比占城

辛丑三年春正月鄧洵武卒

鄧氏自綰以來世濟其奸而洵武阿蔡京尤甚京之敗亂天下禍源自洵武始

童貫承詔罷蘇杭應奉局花石綱

初帝以東南之事付童貫且曰如有急即以御筆行之貫至吳見民困花石之擾衆言賊不亟乎坐此耳

貫即命其僚董耘作手詔罪已罷諸應奉造作局及御前花石綱運并木石彩色等場務而帝亦黜朱勔父子弟姪之在職者吳民大悅

發明

盜不自發必有激之而發者妖不妄作必有感之而作者是時應奉花石之事害民深矣

使老弱轉于溝壑壯者散于四方無恒產者無恒心苟無恒心放僻邪侈無不為矣故方臘一呼遠近響應無恒心焉耳童貫既知花石之害即作手詔罷之由是吳民大悅賊亦甫平可見民心之與天命相合而不相離不得乎此則失乎彼必然之理也徽宗因茲小警益修厥德省浮費斥小人求實政用賢才豈不為有宋守文之主哉惜其盜賊甫滅而應奉復舉花石復用日積月累民怨益深所以淪于危亡而不悟也綱目

特書亦以嘉其自新之念耳

方臘陷婺州又陷衢州

衢州彭汝方被執罵賊而死賊屠其城

二月罷方田○罷州縣學三舍法

省宗學辟雍諸路提舉學士官

方臘陷處州○淮南盜宋江掠京東諸郡知海州張叔夜擊降之

宋江起為盜以三十六人橫行河朔轉掠十郡官軍莫敢嬰其鋒知亳州侯蒙上書言江才必有過人者不若赦之使討方臘以自贖帝命蒙知東平府未赴而卒又命張叔夜知海州江將至海州叔夜使間者

硯所向江徑趨海濱却鉅舟十餘載鹵獲叔夜募死
士得千人設伏近城而出輕兵距海誘之戰先匿壯
卒海旁伺兵合舉火焚其舟賊聞之皆
無鬪志伏兵乘之擒其副賊江乃降

發明

方臘未除宋江復起蓋由積不善必有餘殃
者焉徽宗恣行逆德天下之亂其奈何哉人

君視此可少警矣綱目備書于
冊所以著其亂亡之漸也噫

方臘寇秀州官軍敗之

臘將方七佛引衆六萬攻秀州統軍王子武乘城
固守已而大軍至合擊賊斬首九千賊還據杭州

遼都統耶律伊都叛降金

遼主四子長趙王實訥埒次晉王額魯溫次秦王定
次許王寧晉王文妃蕭氏所生積有人望女真興兵

境內郡縣所失幾半而遼主敗遊不恤忠臣多被陳
斥文妃作歌諷諫遼主銜之樞密使蕭奉先元妃之
兄而秦許王之舅也以國人屬意晉王恐秦王不得
立因潛圖之文妃姊適耶律達哈拉妹適耶律伊都
一日其姊若妹俱會軍前奉先諷人誣文妃與駙馬
蕭昱及伊都達哈拉等謀立晉王而尊遼主為太王
皇遼主遂誅蕭昱達哈拉等而賜文妃死伊都在軍
中聞之大懼即率千餘騎叛降于金遼主遣蕭錫默
等將兵追之及諸間山縣錫默等謀曰主上信蕭奉
先奉先視吾輩茂如也伊都乃宗室豪俊常不肯為
奉先下若擒伊都他日吾黨皆伊都也不若縱之還
即給曰追不及伊都至金金主見之因詔咸州都統
司曰自伊都來灼見遼國事宜
已決議親征其治軍以俟師期

發明

人臣之事君義而已矣故于豐亨之時君有
過則犯顏諫諍蹇難之時君有急則仗節死

義程子曰就是一箇是此之謂也伊都既為都統則非卑末之可比既為宗室則非異姓之可倫當國家厄運之秋正臣子憂勤之日雖搆以讒邪弗克暴白亦當奉辭討伐辨析是非必不得已死之可也夫何忘君背國忍恥事仇其惡可勝言哉特書叛降所以著其不赦之罪也綱目之修誅亂討逆而已耳

廣義

仲虺之告成湯曰德日新萬邦惟懷志自滿九族乃離今觀綱目所書則知遼主于時正

九族乃離之日也何以言之文妃遼主之敵體也遽信讒而見殺晉王遼主之賢子也又有意而殺之伊都遼主之親戚也一旦棄之以資敵國遼主不惟荒淫而又剛暴何足道哉曰然則綱目于耶律伊都何以書官而書其叛降哉蓋具官者所以著其為遼之臣書叛降者所以律其臣叛君也遼

主雖曰不君而在伊都則有甚不可焉者耳噫
遼主自伐其國若此尚何以不伐而望金人哉

夏四月童貫合兵擊方臘破之執臘以歸

二月童貫譚稹前鋒至青河堰水陸並進臘復焚官
舍府庫民居乃宵遁還清溪幫源洞諸將劉延慶王
稟王渙楊惟忠辛興宗王淵等相繼至盡復所陷城
四月貫等合兵擊臘于幫源洞臘衆尚二十萬與官
軍力戰而敗深據巖屋為三窟諸將莫知所入王淵
裨將韓世忠潛行溪谷問野婦得徑即挺身仗戈直
前擣其穴格殺數十人擒臘以出辛興宗領兵截洞
口掠為已功併取臘妻子及偽相方肥等五十二人
于岵石穴中殺賊七萬餘人其黨皆潰臘之亂凡破
六州五十二縣戕平民二百萬所掠婦女自賊洞逃
出裸而縊于林中
者相望百餘里

五月以鄭居中領樞密院事○大蝗

發明

蝗蝻屬春秋書之記災異也人所致者曰災大蝗大災也程子曰民以食為命故有災必

書之于時徽宗間弱京貫奸貪凡百所為皆殃民之事曰然則天何為而先肆毒于民邪曰食者民之命民者國之本故凡災由人致而異出于天人君自致其災如此則是絕民之命而喪其本矣本既喪矣國豈能存此理之決然者也果何係于天哉

○安置御史中丞陳過庭于黃州

過庭以睦寇竊發嘗上言致寇者蔡京養寇者王黼竄二人則寇自平又言朱勔父子本刑餘小人交結權近竊取名器罪惡盈積宜昭正典刑以謝天下三人憾之至是陷以罪罷知蘄州未半道謫黃州安置

發明

楊氏曰堯之舍己從人舜之間見一善上也唐高祖從諫如轉圜太宗導人使諫次也故曰堯舜聖之隨高祖太宗賢之隨徽宗飾非拒諫京黼阿諛苟隨以正人為讐隙視忠言為芒刺過庭因進直言無辜罹罪則君臣之間貪淫樂禍粉飾太平天下之亂于茲決矣故綱目以無罪例書之也

廣義

夫有所為而為者私也無所為而為者公也過庭豈不知蔡京王黼朱勔權傾人主言出而禍隨哉蓋以灼見三人將覆宋室特以其心有所不忍而為徽宗痛言之耳豈有所為而為者哉夫何不此之察反陷過庭于死地惜哉故綱目于過庭之謫不惟銜之而又地之者明其無罪也

閏月復置應奉局

方臘既平王黼言于帝曰士大夫懷姦弗俊抑損應奉妄為譏謗望特置應奉一司臣專總領庶杜姦謀從之仍令梁師成總領于內遂復諸應奉局奪發運輓漕之卒為用戶部不敢詰自是四方珍異之物充初二人之家而入尚方者纔什一

廣義

分注載方臘既平王黼言于帝曰士大夫懷姦弗俊抑損應奉妄為譏謗特望置應奉一

司臣專總領庶杜姦謀從之遂復諸應奉局嗚呼方臘之起因民不忍于應奉局故其得以藉口而荼毒生靈以舒平昔之積怨宿恨也于士大夫何預焉今王黼闕知徽宗溺于玩好故其言一入而應奉之局即復矣使徽宗聽士大夫之言如聽王黼則災害不生而禍亂不作矣雖然王黼童貫皆巨姦也觀此則黼罪又浮于貫矣吁徽宗聞縱欲之言如魚得水訓志之言如水沃石不亡何待宗

秋七月廢新置州軍

夔峽廣南邊臣開納土之議建立軍州上蠹國用下殫民財至是言者以為病乃廢純亨滋祥祺泰承播思隆允孚十二州及熙寧遵義二軍或為縣或為堡寨

黑青見于禁中

元豐末嘗有物大如席夜見寢殿上而神宗崩元符末又見哲宗崩至大觀間漸晝見政和以來大作每出若列屋摧倒之聲其形僅丈餘彷彿如龜黑氣蒙之不小了了氣之所及腥血四灑又或變人形或為驢晝夜出無時多在掖庭及內殿習以為常人亦不大怖又洛陽府畿內忽有物如人或如犬其色正黑不辨眉目始夜則掠小兒食之後雖白晝入人家為患所至喧然不安謂之黑漢有力者夜執鎗自衛亦

有託以作惡者二年乃息

發明

積祥妖孽隨感而應善不善之積而已誠齋楊氏曰惟天愛君惟聖畏天天之于君厭之

者則驕之以嘉祥愛之者則謹之以災異絕之者則侈之以強盛念之者則懼之以災害徽宗窮極奢淫棄滅禮法以賢為不肖以不肖為賢土木大興兵戎妄作花石禽獸取自遐方聲色貨利充牣畿甸則其見絕于天災異之來必矣宮禁深嚴黑青條見民間喧哄易于皇惑此蓋乖戾之氣醞釀而成也上書大蝗所以著民命之難全此書黑青所以著天心之告戒即當時之故事觀之始可知綱目書法之深意而人心天理之本然矣

廣義

按春秋傳異天之變也災人之害也一歲中既有大蝗之災又有黑青之異災異迭興如

此正天怒民怨之時也徽宗方且罪諫官縱已欲不畏天變不恤民隱雖欲不亡得乎孟子曰安其危而利其災樂其所

以亡者徽宗之謂也

八月加童貫太師封楚國公○方臘伏誅

改睦州為嚴州
歙州為徽州

廣義

漢世非軍功不侯故其末世子孫有封宦者為侯君子惡之徽宗之于童貫殆有甚焉既

加以師傅之尊復錫以上公之爵何哉揆厥所由皆童貫邀功之所致也且方臘皮劉疆土戕害生靈誅之恨不早耳童貫于夏四月執方臘以歸即當致辟于獻俘之日今則濡滯逡巡直待加封然後正臘之罪謂非其邀功之奸計乎况太師國公人臣之極位而偁于乘輿者也故成王以宋公封

微子而諄諄焉以僭偪為戒者正恐其覬覦之心
潛滋暗長于隱微之中也設使貫心無厭又欲以
等而上之者求封不知將何以畀之也其與夫稱
父母目門生者無異矣厥後昏德之號誰其尸之

九月以王黼為少傅鄭居中為少師○詔宦者李彥括
民田于京東西路

初胥吏杜公才獻策于內侍太傅楊戩立法索民田
契自甲之乙乙之丙辰轉宛尋至無可證則度地所
出增立賦租始于汝州浸淫于京東西淮西北括廢
堤棄堰荒山退灘皆勒民主佃額一定後雖衝蕩回
復不可減一邑率于常賦外增租錢至十餘萬緡水
旱蠲稅此不得見擢公才為觀察使至是戩死以內
侍李彥繼之彥狠復密與王黼表裏置局汝州臨事
愈劇凡民間美田使他人投牒告陳皆指為天荒雖

執印券皆不省魯山闔縣盡括為公田訴者輒加威刑致死者千萬京西提舉官及京東州縣吏皆助彥為虐民不勝忿痛發物供奉大抵類朱勔責辦于民無休息期農不得之田牛不得耕墾殫財靡帛力竭餓死或自縊輒間如龍鱗薜荔一本輦致之費踰百萬喜賞怒刑禍福轉手因之得美官者甚衆前執政冠帶操笏迎謁彥馬首彥處之自如所至倨坐堂上監司郡守不敢抗禮有言于帝梁師成適在旁抗聲曰王人雖微序于諸侯之上豈足為過言者懼不敢復言

發明

王者以四海為家以天下為度天之立君所以為民君子得民所以守國民富則君不至

于獨貧民貧則君不能以獨富是故省刑罰薄稅歛以足民之食節財用省浮費以寬民之力蓋君之所畏者天所寶者民微宗災異迭見而不悟是乃不畏乎天也虐政繼作而不息是乃不寶乎民

也民心既畔天命亦離雖有天下烏可以一朝居
哉矧民田衣食所資今而括之則是與民爭利而
貽害大矣安有堂堂天朝較利民間尚能君臨萬
國而父母斯民乎直書于冊所以著其荒縱昏庸
之失也

廣義

觀分注備載李彥括民田之事則知于時民
窮財盡矣善乎有若之告哀公曰百姓足君

孰與不足百姓不足君孰與足故曰民惟邦本本
固邦寧正陸宣公所謂財者民之心也傷其心是
傷其本傷其本則榦枝凋瘵而根柢廢拔矣昔紂
以民財而足于鹿臺故不待牧野之師而根柢先
拔于鹿臺德宗以民財而足于瓊林故不待奉天
之幸而根柢先拔于瓊林徽宗括民田于京東西
路然亦不待如金之禍而根柢先拔于京東西路
矣自古國之所以亡者未有不先民窮財盡而後及

之也有國者烏可自傷
其本而先拔其根柢歟

冬十月詔童貫復領陝西兩河宣撫使○十一月馮熙
載罷○以張邦昌為中書侍郎王安中李邦彥為尚書
左右丞

邦彥本銀工子也俊爽美風姿為文敏而工然生長
閭閻習猥鄙事應對便捷善謳謔能蹴鞠每綴街市
俚語為詞曲人爭傳之自號李浪子以善
事中人爭薦譽之累擢翰林承旨進右丞

廣義

前詔宦者李彥括民田于京東西路是理財

之非也今用張邦昌王安中李邦彥是用人
之失也為國之道莫要于理財用人二者
而已二者胥失則宋事日非蓋可知矣

金侵遼中京

初耶律伊都奔金金尼瑪哈言于金主曰遼主失德中外離心今乘其釁可襲取中原天時人事不可失也金主然之羣臣言時方寒金主不聽竟用尼瑪哈計以舍音都統內外諸務普嘉努尼瑪哈幹布幹里雅布富勒呼副之耶律伊都以為鄉導以趨遼中京大定府

廣義

耶律伊都遼之親戚也分注載金以耶律伊都為鄉導以趨遼中京大定府鳴呼遼主荒

淫不道豈特所謂親戚畔之者哉其即視君如寇讐者也敵情狠愎固不足道其為後世有國者之鑑

不亦痛且切乎

壬寅四年春正月以蔡攸為少保○金克遼中京遼耶律

延禧殺其子晉王額魯溫走雲中

金克中京遂下澤州遼主時獵于鴛鴦灤伊都引羅索庵至遼主憂甚樞密使蕭奉先曰伊都乃王子班之苗裔此來欲立甥晉王額魯溫耳若為社稷計不惜一子誅之可不戰而退會即律薩巴等復謀立額魯溫事覺遼主召樞密使蕭德劬岱等議曰反者必以此兒為名若不除去何以獲安德劬岱唯唯遼主乃遣人縊之或勸額魯溫亡額魯溫曰安忍為蕞爾之軀而失臣子之節遂就死遼主素服三日即律薩巴等皆伏誅額魯溫素有人望諸軍聞其死無不流涕由是人心解體伊都引金兵逼遼主行宮遼主率衛士五千餘騎自駕鴛鴦灤走雲中遺傳國璽于桑乾河

發明

克者力勝之詞殺者殺無罪之詞延禧當國祚傾危之時遊宴無度不恤國政固有可亡

之理然而祖宗土地不能死守惟務逃奔謂之何哉晉王延禧之子人望所鍾頃因讒忌即縊殺之噫其志亦陋矣意豈不曰晉王既有人望苟立為君庶幾能保宗社少延契丹之祀顧非幸歟亟殺嫡冢此何禮耶故特斥名而書殺所以著其殘悖不明之罪也

廣義

觀分注備載遼人為金所敗之詳則知遼主之竄身失國惟在偏聽蕭奉先一人耳蓋前

既聽奉先之譖而殺一賢妃後又聽奉先之譖而殺一賢子國人安得不解體而敵國安得不乘釁哉傳曰辟則為天下僇者其遼主之謂也

二月管勾太平觀陳瓘卒

或問游酢以當今可以濟世之人酢曰四海人才不能周知以所識知陳了翁其人也劉安世嘗因瓘病

使人勉以醫藥自輔曰天下將有賴于公當力加保養以待時用至是卒于楚州

發明

瑾忠亮有守遭時擯棄客死楚州誠可惜也網目因其卒而特具今職者則其不滿當時

之意可

見笑

三月金襲遼軍延禧走夾山

金尼瑪哈敗遼奚王于北安州拔其城遣古紳略近地獲遼護衛實訥埒知遼上下離心使人報舍音曰遼主窮迫若失機會事難圖矣舍音意未決幹布勸從之舍音乃出青嶺尼瑪哈出瓢嶺期會于羊城藥遼兵在雲中以金兵為憂蕭奉先猶言女真雖能攻我上京終不能遠離巢穴及聞金師將出嶺西遼主遂趨白水灤尼瑪哈以精兵六千襲之將近行營遼主計不知所出遂乘輕騎入夾山始悟奉先之不忠

怒曰汝父子誤我至此誅汝何益恐軍心忿怒爾曹
避敵苟安禍必及我其勿從行奉先下馬哭拜而去
行未數里左右執其父子縛送金兵金人斬其長子
昂以奉先及其次子昱械送金主道遇遼軍奪以歸
並賜死蕭德勒索自
知不免亦絕食死

廣義

分注載遼主于事勢窮蹙之際猶不忍誅奉
先而遣之使去既去被左右縛送金兵金兵

械送金主道遇遼軍奪以歸國遼主不得已而賜
之死者何哉蓋遼主之亡也亡于蕭奉先之一人
耳其罪大惡極人人得而誅之今既悟其不忠而
猶隱忍不底其罪者失討賊也欲其國之不亡得
乎

遼燕京畱守李處溫等以耶律淳稱帝遙廢其主延禧

為湘陰王

卷十

遼主之走雲中留南府宰相張琳參知政事李處溫與淳守燕京處溫聞遼主入夾山命令不通即與族弟處能及子奭外假怨軍內結都統蕭幹謀立淳處溫邀張琳白其事琳曰攝政則可即真則不可處溫曰今日之事天意人心已定豈可易也琳不敢執遂與諸大臣耶律達實左企弓虞仲文曹義勇康公弼集蕃漢百官諸軍詣淳府引唐靈武故事勸進淳不許將出李奭持赭袍被之令百官拜舞山呼淳驚駭再三辭不獲從之羣臣上尊號曰天錫皇帝建元天福以妻蕭氏為德妃妃普賢女也加處溫守大尉張琳守太師餘與謀者授官有差改怨軍為常勝軍軍旅之事悉委達實達降遼主為湘陰王遂據有燕雲中及上京遼西之地遼主所有沙漠已北西南西北路兩都招討府諸蕃族而已淳遣使來報免歲幣結

好亦遣使奉表于金乞為附庸金人不報耶律達實者太祖八世孫通遼漢字善騎射登進士第累擢翰林學士承旨遼謂翰林為林牙故稱達實林牙

發明

按劉氏書法曰以稱帝何不宜稱者也帝王所自立者也見以於人則不足以帝矣延禧

未嘗書主此書廢其主何正名分也處溫等奉命畱守耶律淳承旨監軍正宜號召豪傑北向爭衡恢復故地奉迎乘輿必不得已死守燕京可也夫何貪圖榮利共行悖逆皆綱目之所深絕者故書稱帝以著其僭竊之罪書廢其主以著其叛亂之罪觀綱目之所書則其君臣之分明逆順之勢定而亂臣賊子殆無所容于天地之間矣凡若此類微君子莫能修之

廣義

嗚呼觀遼國之亡也則知當時君臣父子夫婦兄弟之大倫一旦陵夷漸滅銷鑠已盡哀

哉雖欲不亡其可得乎孟子曰人之所以異于禽獸者幾希夫虎狼猶父子也蜂蟻猶君臣也鵲鵲焉以兄弟睚鳩焉以夫婦是故生于天地間者未有外倫理而能獨立者也豈有軍國子民而置倫理于不講哉故蒯輒拒父孔子惡之夷齊讓國孔子賢之今也淳雖遼主之叔以分言遼主君也淳則臣也平日不能如周公之訓成王今因家國顛覆遽爾稱帝建元降封其君證以李唐靈武故事吾誰欺欺天乎且昔者明皇幸蜀肅宗即位靈武遙尊明皇為太上皇帝後世大儒猶曰肅宗即位靈武分明是篡况降封乎曰為淳計者奈何曰量力而動力能迎主歸國則迎不能則如張琳之計而為君死社稷則庶乎其可也

金克遼西京

金人攻西京大同府遼耿守忠救之尼瑪哈摩囉歡
幹布等繼至尼瑪哈率麾下自其中衝擊使餘兵去
馬從旁射之守忠大敗其衆殲
焉西京西路州縣部族皆降金

詔童貫蔡攸等勒兵巡邊以應金

遼之建國在宋
之先相繼百有
餘年一旦交遼
之敵結金以圖
之不知唇亡齒
寒失策極矣矧
信誓昭然甘於
背棄其不祥孰
大焉固不待靖
康之末而知其

朝廷既與金約夾攻遼以復燕雲蔡京童貫主之熙
河鈐轄趙隆嘗極言其不可貫曰君能共此當有殊
拜隆曰隆武夫豈可干賞以敗祖宗二百年之好異
時啓釁萬死不足謝責貫不悅鄭居中亦力陳不可
謂京曰公為大臣不能守兩國盟約輒造事端誠非
廟算京曰上厭歲幣五十萬故耳居中曰公獨不思
漢世和戎用兵之費乎使百萬生靈肝腦塗地公實
為之由是議寢及金數敗遼兵童貫乃復乞舉兵居
中又言不宜幸災而動待其自斃可也時睦卨初平
帝亦悔于用兵王黼獨言曰中國與遼雖為兄弟之

邦然百餘年間彼之所以開邊慢我者多也且兼弱攻昧武之善經也今而不取燕雲女真即強中原故地將不復為我有帝遂決意治兵黼于三省置經撫房專治邊事不閤樞密括天下丁夫計口出筭得錢六千二百萬緡以充用黼又遺童貫書曰太師若北行願盡死力會間即律淳自立乃以蔡攸副貫勸兵十五萬巡北邊以應金且招諭幽燕攸童駭不習事謂功業可唾手致入辭之日二美嬪侍帝側攸指而請曰臣成功歸乞以是賞帝笑而弗責

發明

老子曰佳兵者不祥之器夫兵猶火也不戢將自焚徽宗志在混一海宇用兵不已蓋自

政和五年代西夏討諸夷之後凡八年間兵禍四起征調日繁凡見于綱目所書者皆可覆也一旦強隣竊發大駕蒙塵幾亡社稷是果誰之咎哉此書勸兵巡邊以應金下書進兵擊遼敗績其為殷

鑒豈不甚明人主觀此其亦知所自治而不以窮兵黷武為意乎

廣義

中國與敵人盟不能保其不渝蓋敵情貪恃稍不如意則必敗盟矣是故唐肅宗約戎狄以求援而戎狄背其約德宗信戎狄以與盟而戎狄劫其盟蓋盟者出于事不獲已列國有盟春秋惡之況與強敵盟乎此聖人所以書隱公及戎盟于唐而必曰之者甚其非義也今徽宗與金約夾攻遼其與虞公假道之愚何異哉後之帝中國者慎勿刺漆以止渴養虎以貽患可也

夏四月金取遼東勝諸州獲阿蘇以歸

阿蘇至金金主杖而釋之

五月童貫進兵擊遼敗績退保雄州詔班師貶都統制

种師道為右衛將軍致仕

貫至高陽關用知雄州和說計降黃榜及旗述弔民
伐罪之意且云若有豪傑能以燕京來獻者即除節
度使遂命統都制种師道護諸將進兵師道諫曰今
日之舉譬猶盜入鄰家不能救又乘之而分其室焉
無乃不可乎貫不聽分兵為兩道師道總東路兵趨
白溝辛興宗總西路兵趨范村耶律淳聞之遣耶律
達實蕭幹禦之師道次白溝遼人謀而前師道前軍
統制楊可世敗績士卒多傷師道先令人持一巨槌
自防賴以不大敗退師雄州遼人追擊至于城下辛
興宗亦敗于范村帝聞兵敗而懼詔班師遼使來言
曰女真之侵本朝亦南朝之所甚惡也今射一時之
利棄百年之好結強大之鄰基他日之禍謂為得計
可乎救災卹鄰古今通義惟大國圖之貫不能對种
師道復請許之和貫不納而密劾師道助賊王黼怒

責授師道右
衛將軍致仕

發明

遼人未有可伐之罪故書擊而不書伐徽宗以官人為制將雖舉朝力爭皆不之聽至是

果辱王師故書童貫擊遼敗績以罪之上書童貫敗績下書貶种師道為右衛將軍致仕則是連坐之人明矣夫童貫身為制將總率大兵失律誤國謂宜亟誅以正王法而乃甫免刑誅即劾師道則是徽宗知有童貫而不知有國法也比事觀之其義自見

廣義

大抵行師貴乎名實相副而忌乎有名無實也名實相副者勝有名無實者敗此理之必

然者也何則商湯周武仁義之師名實相副者也宋襄成安仁義之師有名無實者也此商湯周武之所以勝而宋襄成安之所以敗歟今童貫用和說之計以聲弔伐之舉且云若有豪傑能以燕京

來獻者即除節度使觀此則知宋之出師惟在欲得無京耳惡在其為弔伐哉此所謂有其名而無其實者是也安能服豪傑之心問敵國之罪以求必勝乎昔者齊桓伐楚責其不貢包茅是也然曰昭王南征不返則非矣此所以來楚之傲辭而終不能成厥功也善乎老种有盜入鄰家之譬何其當哉况乎遼使之言雖出于一時之倉卒要亦公平正大之說此誠決汴宋將亡之確論也豈有堂堂中國而為此不仁不義之舉而反欲取勝于人耶或曰師道之喻可謂善矣而其處已何如曰未善也曰曷為未善曰師道既以朝廷此舉為非則當角巾私第口不言兵可也何甘心于刑餘奴隸之節制乎有前所喻而不能退避是不能見幾明決也甘受貫之節制而不能破敵是其戰陳無勇也曰然則綱目于其貶何以書致仕乎曰正以見宋之此舉為非專在童貫而不由乎師道也曰使

宋此舉為得而師道不能
死敵何如曰律之而已

六月以王黼為少師○遼耶律淳死其妻蕭氏稱太后
主國事李處溫伏誅

淳寢疾聞遼主傳檄天德雲內朔武應蔚等州合諸
蕃精騎五萬約以八月入燕并遣人勞問索衣裘若
樂淳甚驚命北南面大臣議而李處溫蕭幹等有迎
秦王拒湘陰王之說惟南面行營都部署耶律寧曰
天祚果能以諸蕃兵大舉奪燕則是天數未盡豈能
拒之否則秦湘父子也安有迎子而拒其父者處溫
等以寧扇亂軍心欲殺之淳曰彼忠臣也焉可殺天
祚果來吾有死爾復何面目相見邪已而淳疾自知
不起密授處溫蕭幹馬步軍都元帥意將屬以後事
及蕭幹等召宰執入議處溫稱疾不至陰聚勇士為

備給云奉密旨防他變淳死蕭幹等乃立淳妻蕭氏為皇太后主軍國事奉遺命遙立秦王定為帝蕭后遂稱制改元德興諡淳為孝章皇帝廟號宣宗葬于燕西之香山蕭后聽政幹以后命召處溫至以時方多難未即加誅但追毀元帥劄子處溫父子懼禍南通童貫欲挾蕭后納土北通于金欲為內應事覺后執處溫問之處溫自陳有定策力后曰誤秦晉國王者皆汝父子何功之有并數其前罪惡數十處溫無以對乃賜死鸞其子奭而磔之籍其家得錢七萬緡金玉寶器稱是皆為宰相數月間所取也

發明

死者賤而絕之之辭淳前既已稱帝至是卒而斥名書死者不予淳之僭稱也下書其妻

蕭氏稱太后以見不宜稱也處溫助淳悖逆誤國殄民乃亂臣賊子之魁桀耳分注以賜死為文綱目變文特書伏誅非所以予蕭氏之能討有罪也為天下之討有罪也其所以扶三綱立人極而教

詔後世
也嚴矣

廣義

嗚呼淳不能迎主歸國而反乘時射利是穿
箭之不若也今而得戴其元以歸地下幸矣

及乎李處溫以禽獸之行遙立其君之子為帝厥
罪何可勝誅惟即律寧不思乎此故曰自古安有
迎子而拒父者豈非造次顛沛而能禮義自守者
哉此寧之所以異于國人也多矣然則分注戴李
處溫不過曰賜死而其綱則大
書曰伏誅何邪正名定罪也

夏人救遼金襲敗之于宜水

夏主使李良輔將兵三萬救遼金將斡魯羅索敗之
于宜水追至野谷澗水暴至夏人漂沒者不可勝計
發明
閏元年齊人救邢春秋義之凡書救者未有
不善之也救在京師則罪列國宋救李壇之

圍是也救在外邦則罪中國契丹救北漢夏救遼是也救在遠國則罪四鄰吐蕃嘉勒斯賚敗元昊于河湟是也救而不速救者則書所次以罪其慢康王入衛次于東平是也救而不敗救者則書所至以罪其怯曲端次于裏樂不進是也兵者綱目所甚重衛靈公問陳孔子對曰軍旅之事未之學也獨至于救兵而書法若此君子之情見矣其稱人進之也輕行而掩之曰襲詭道而勝之曰敗皆所以貶金而予夏也

廣義

當是時也遼金之不敵也審矣夏人何以救為哉曰彼但知救災卹鄰之意其間強弱非

所論也嗚呼觀夫夏人此舉則知其正大光明非若宋之助叛以伐無罪之國也孔子曰夷狄之有君不如諸夏之亡也信哉

秋七月詔童貫蔡攸再舉伐遼以劉延慶為都統制

王黼間即律淳死復命童貫蔡攸治兵以河陽三城節度使劉延慶為都統制

初收經制錢

先是命陳遘經制江淮七路治于杭州以供餽餉遺以財用不給創議比較酒務及度公家出納錢糧量取其贏號經制錢遂為東南七路之害

發明

嗚呼宋之虐民益甚矣東南為應奉花石之擾民不聊生今而又收經制則是民間之利

悉歸于上如水益深如火益熱而大為東南七路之害矣特書曰初蓋譏之也

八月金阿古達襲遼延禧于石輦鐸延禧敗走

遼主既失西京及沙漠以南遂奔于額蘇倫金舍音使幹里雅布告金主曰今雲中新定諸路遼兵尚數萬新降之民其心未固諸將望幸軍中金主從之既而聞遼主在大漁濼乃將金兵萬人襲之普嘉努幹里雅布率兵四千為前鋒晝夜兼行追及遼主于石輦鐸軍士至者才千人遼兵二萬五千方治營壘普嘉努與諸將議耶律伊都曰我軍未集人馬疲劇未可戰也幹里雅布曰追及遼主而不亟戰日入而遁則無及矣遂戰短兵接遼兵圍之數重副都統蕭特烈諭軍士以君臣之義士皆殊死戰遼主謂幹里雅布兵少必敗與妃嬪登高阜觀戰伊都指遼主麾蓋以示諸將幹里雅布遂以騎兵馳赴之遼主望之大驚即遁去遼兵遂潰幹里雅布還金主曰遼主去不遠盍亟追之幹里雅布追至鄂勒哲圖遼主棄輜重而遁蕭特烈被執

九月除朝散郎宋昭名

昭上書極言遼不可攻金不可鄰異時金必敗盟為中國患乞誅王黼童貫趙良嗣等且曰兩國之誓敢盟者禍及九族陛下以孝理天下其忍忘列聖之靈乎陛下以仁覆天下其忍置河北之民于塗炭之中而使肝腦塗地乎王黼大怒之除昭名編管海州

發明

家語曰人臣而忠其國者爵祿不足以賞也諛其君者刑罰不足以誅也宋之諸臣依阿

取容以饗富貴而國家利害固肯究心宋昭官非臺諫職非言責不忍素餐之恥力陳經國之圖見忤奸黨即除其名果何說哉其後金人敗盟一如昭料若合符節然則君子之先見出于尋常萬萬矣故書除宋昭名所以著其無罪也

廣義

觀夫宋昭上書之言不惟中心激烈而且有先見之明此即柳惲之料吐蕃也何其驗哉

綱目大書其官者予之之深也

金遣使來命趙良嗣報之

金人聞童貫舉兵恐朝廷徑取燕而歲幣不可得乃遣使來議師期帝遣趙良嗣報之且言不負初約

遼將郭藥師以涿易二州來降

遼常勝軍帥郭藥師為涿州留守以蕭后立蕭幹專政國人多貳謂所部曰天祚失國女政不綱宋天子重兵壓境此男兒取金印時也遂擁所部八千人奉二州來降童貫受之以聞詔授恩州觀察使以兵隸

劉延慶

發明

外國之臣名姓不登于史冊者微也藥師遼將曷為以姓名通重地也以地叛雖賤必書

地以名其人終為不義弗可滅矣其書來降是接我以利而我入其利兩譏之也胡氏曰為國以義不以利如以利則上下交征而國必危矣為己以義不以利如以利則患得患失亦無所不至矣綱目于叛人雖賤特書其名以懲不義懼淫人為後戒也州而言以者言所歸之易也如春秋書莒牟婁來奔同意

冬十月劉延慶及郭藥師進兵攻遼藥師襲燕敗績延慶兵潰

童貫遣劉延慶郭藥師將兵十萬出雄州以郭藥師為鄉導渡白溝延慶軍無紀律藥師諫曰今大軍跋

隊行而不設備若敵人置伏邀擊首尾不相應則望塵奔潰矣不聽至良卿達蕭幹率兵來拒延慶與戰而敗遂閉壘不出藥師曰幹兵不過萬人今悉力拒我燕山必虛願得奇兵五千倍道襲之域可得也因請延慶子光世簡兵為後繼延慶許之遣大將高世宣楊可世與藥師率兵六千夜半渡盧溝倍道而進質明常勝軍帥甄五臣領五千騎奪迎春門以入藥師等繼至遣人諭蕭后使趣降蕭后密報蕭幹幹舉精甲三千還燕巷戰光世渝約不至藥師失援而敗與可世棄馬縋城而出死傷過半世宣死焉延慶營于盧溝南幹分兵斷餉道擒茂糧將王淵得漢軍二人蔽其目畱帳中夜半為相語曰吾師三倍漢軍敵之有餘當分左右翼以精兵衝其中左右翼為應舉火為期殲之無遺既言乃陰逸一人歸報延慶聞而信之明旦見火起以為敵至即燒營遁士卒蹂踐死者百餘里幹因縱兵追至涿水而去自熙豐以來所

儲軍實殆盡退保雄州燕人知宋之無能為作賦及歌詩以誚之樂師還猶進安遠軍承宣使

廣義

是役也童貫以奸貪閹豎樂師以叛君降敵而延慶又非智勇之將正孟子所謂以若所

為求若所欲盡心力而為之後必有災是也惟是之故故蕭幹帳中之謀一出宋師遽爾狼狽積年所蓄軍實一旦盡為金有宜有以來燕人之謂也由是觀之則知君能知人然後可以擇將將得其人然後可以克敵

徽宗何足以知之

以蔡攸為少傅判燕山府○十一月金人來議燕地十二月遣趙良嗣復如金求營平灤三州

初朝廷與金約但求石晉賂契丹故地而不思平營灤三州乃劉仁恭獻契丹以求援者既而王黼悔欲

併得之金主不肯及趙良嗣往金主使普嘉努責良
嗣以出兵失期且云今更不論元約特與燕京薊景
檀順涿易六州良嗣言元約山前山後十七州今乃
如此信義安在抗辨數四金人不從良嗣乃與其弟
李靖偕來止許山前六州帝復
遣良嗣送之且請營平灤三州

發明

遣使須索之謂求昔者天王求賄求金求車
春秋譏之況求地于敵人乎綱目于求營平

灤三州特書曰求垂後戒也王者有求下觀而化
孟子曰王曰何以利吾國大夫曰何以利吾家士
庶人曰何以利吾身上下交征利而國危矣苟為
後義而先利不奪不餒胡氏曰古之人君必內脩
厥德辨上下定民志節以制度不傷財不害民故
府庫充實倉廩盈餘四方觀德萬國來王而天下
治矣及侈心一動沒不可遏必至于三綱淪沒五
典弛廢迨其亡國滅身而後止也觀綱目所書則

見宋室喪亂之由而知興衰撥亂之說矣

廣義

抑觀燕乃石晉故地賂契丹者與夫營平灤三州皆非宋祖宗立國之初所得之地也徽

宗何不自揣而屑屑請求于金邪然謂之求則必屈已下人而俛首聽其俵撥耳孰謂剛明之君有是哉曾子曰吾聞與人者常驕人受人者常畏人蓋以此耳書稱成湯由七十里而至于有萬邦其所有之萬邦未聞其有一之請求于人也惟知當時室家相慶而已稱文王曰惟我有周誕受多方其所有之多方亦未聞其有一之請求于人也惟知當時西土怙冒而已故成湯自諸侯而陞為天子文王由西伯而道行中國若火之始然而自有不可遏者矣後世不量力而度德輒請地求地于人其最甚者惟智伯耳智伯之下又有徽宗焉使智伯倘德自強而無狼臯之貪求則豈特頭漆于襄

子而襄子且將見役矣今徽宗脩德自強而無燕雲之固請亦豈至身歿于金人而金人必將受命矣昔唐太宗所謂剖腹藏珠柳子厚所謂負販者智伯徽宗似焉

加郭藥師武泰節度使○金克遼燕京耶律淳妻蕭氏
奔天德

童貫再舉伐燕不克成功懼得罪乃密遣王環如金以求如約夾攻金主遂分三道進兵遼德妃蕭氏五上表于金求立秦王定金主不許遼人遂以勁兵守居庸關金兵至關崖石自崩戍卒多壓死遼人不戰而潰金兵度關而南遼統軍都監高六等送款于金金主至燕京遂自南門入使尼楚赫羅索陳于城上金主次于城南遼宰相左企弓參政虞仲文康公弼樞密使曹義勇張彥忠劉彥宗等奉表降詣金營請

罪金主並釋之命守舊職而遣左企弓等撫定燕京諸州縣蕭德妃與蕭幹自古北口趨天德于是遼五京皆為金主遣精騎送趙良嗣還且獻遼俘

廣義

嗚呼貪功利者莫如童貫而無能為者亦莫如童貫分注云童貫再舉伐遼不克成功懼

得罪乃密遣王環如金以求如約夾攻及至克遼未聞其有分毫之力况乎金師至遼如入無人之境其陷燕京也若探物于嬰兒之握何其易哉此所以來輕宋之心而垂涎于汴鼎也曰遼主何以書名而于其后何以書妻因其事而貶之也故主猶存所以斥其名而妻其后也故曰春秋成而亂臣賊子懼臣亦曰綱目修而亂臣賊子懼

萬歲山成更名曰艮嶽

山周十餘里其最高一峯九十步上有亭曰介分東南二嶺直接南山山之東有萼綠華堂書館八仙館紫石巖樓真澄覽秀軒龍吟堂山之南則壽山兩峯並峙有鴈池囃囃亭山之西有樂寮西莊巢雲亭白龍泚濯龍峽蟠秀練光跨雲亭羅漢巖又西有萬松嶺半嶺有樓曰倚秀上下設兩關關下有平地鑿大沼沼中作兩洲東為蘆渚浮陽亭西為梅渚雪浪亭西流為鳳池東作為鴈池中分二館東曰流碧西曰環山有巢鳳閣三秀堂東池後有揮雪廳復由磴道上至介亭亭左復有極目亭蕭森亭右復有麗雲亭半山北俯景龍江引江之上流注山間西行為漱瓊軒又行石間為煉丹凝觀環山亭下視江際見高陽酒肆及清澌閣北岸有勝筠庵躡雲臺蕭閒館飛岑亭支流別為山莊為回溪又于南山之外為小山橫亘二里曰芙蓉城窮極巧妙而景龍江外則諸館舍尤精其北又因瑤華宮火取其地作大池名曰曲江池

中有堂曰蓬壺東盡封丘門而止其西則自天波門
橋引水直西殆半里江乃折南又折北折南者過闔
闔門為複道通茂德帝姬宅折北者四五里屬之龍
德宮既成帝自為艮嶽記以為山在國之艮位故也
初朱勔于太湖取石高廣數丈載以大舟挽以千夫
鑿城斷橋毀堰折牒數月乃至會得燕地因號昭功
敦慶神運石立于萬歲山又作絳霄樓勢極高峻盡
工藝之巧其後羣閹興築不已于是山林巖壑日益
高深亭臺樓觀不可稱紀又以金
芝產于萬壽峰因更名壽嶽云

發明

特書曰成讖久費也政和七年冬書作萬歲
山至是年冬而始竣事則跨歷六年極土木

之盛殫億萬之財天怒于上而不悟民怨于下而
不知欲蓋彌章泰然自侈是時強敵在外漸為國
患宋之君臣曾未見其思患預防之心而徒今日
歛民貲明日勞民力自古荒淫之君愚之甚者未

有如徽宗者也噫民心既離天命亦叛雖有臺池鳥獸豈能獨樂哉綱目書此文無貶詞乃所以深貶之也其垂世立法之意嚴矣

廣義

前輩嘗謂秦皇以奢侈暴斂而亡漢武奢侈暴斂不異于秦而其國不亡者用人納諫悔

過等事之善與夫後人不失其道而無子嬰之愚故也又况盜賊滿山終無豪傑下至叔寶楊廣無足為道今也徽宗艮嶽之奢溢于阿房之侈花石之擾浮于頭會箕斂籍元祐黨人毀蘇黃文集甚于焚書坑儒凡百所為甲于秦皇而其胸襟齷齪又非秦皇比也其視漢武不啻天冠地履何敢望焉况乎金人一豪莫之與競實非漢武時賊盜而徽宗用兵行師乃付之昏庸閹寺之賈謩則久病尪羸之人而加以酒色並行雖命扁烏能起哉其可悲也已

戶部獻今年民數

時天下分為二十六路京府四府三十州二百五十
四監六十三縣一千二百三十四戶二千八十八萬
二千二百五十八口四千六百七十三萬四千七百
八十四戶口視西漢盛時蓋有加焉隋唐疆里雖廣
而戶口
皆不及

發明

元豐六年戶部奏戶一千七百二十一萬一
千七百一十三至是所奏之數戶二千八十

八萬二千二百五十八口四千六百七十三萬四
千七百八十四較之元豐實多三分之一夫有盛
必有衰固天地盈虛之數徽宗恃其戶口之富窮
奢極欲自謂長享太平不料禍出目前生民塗炭
才四年間其天下大亂向來庶富之盛果何恃乎
方其溺愛之時特一蔡京童貫所信僅若毫芒然

而驕奢淫佚之事皆由之而出其極至于喪壞生靈若是其衆可謂其源甚微其流甚廣者矣人主觀此要當兢畏持守毋使乍盛而忽衰暫安而遽危則亦庶乎其可也於戲保治之難如此可不畏諸可不戒

廣義

分注云戶口視西漢盛時蓋有加焉隋唐疆

理雖廣而戶口皆不及可謂盛矣嗚呼盈成之運雖賢明之君尚或難于撫馭況中材與庸闇者乎昔唐太宗與羣臣論創業守成乃曰創業固難守成亦不易蓋以知夫君心之侈不生于天下多事之日每生于天下富豐之時逸樂者危亡之本憂患者治平之基徽宗當天下之富豐則當兢業自持常恐仰馬愧于天俯馬忤于人而吾宗社之重何以堪之厥位之尊何以保之四夷未王何以來之金人桀黠何以待之若游大川懼不克濟

親君子遠小人旁求俊彥以釐天事若然則仰不愧天俯不忤人宗社不足安厥位不足保四夷來王而金人聽命也必矣大易蒙之六五曰童蒙吉是也惟其不然故不至于危亡不止也大書戶部獻今年民數則知徽宗之志益驕矣

癸卯五年

金太宗完顏烏哥邁天會元年

春正月遼知北院樞密事奚和

勒博自稱奚帝

金兵入燕奚和勒博即箭筈山自立為奚國皇帝改元天復設奚漢渤海三樞密院改東西節度使為二王分司遼主命都統耶律瑪格討之

發明

自稱者不宜稱也人臣當國步艱難之時不能匪躬濟蹇而乃據地稱尊皆綱目之所惡

也故夫書遼知北院樞密事奚和勒博所以正君臣之分也書自稱奚帝所以嚴上下之防也

金遣使來趙良嗣復如金

良嗣至燕與金主議燕京西京之地金主曰若宋必欲平灤等州則并燕京不與因以答書先示良嗣良嗣讀至燕京用本朝兵力攻下其租稅當歸本朝良嗣因曰租稅隨地豈有與其地而不與其租稅者尼瑪哈曰燕京自我得之則當歸我大國熟計若不早見與請速追涿易之師無畱我疆于是遣李靖等與良嗣偕來靖既入對遼見王黼黼謂靖曰租稅非約也上意以交好之故欲以銀絹充之靖復請去年歲幣帝亦特許之仍命良嗣與靖偕使

以王安中知燕山府郭藥師同知府事

朝廷以金人將歸燕謀帥臣守之左丞王安中請行
王黼贊于帝遂授安中慶遠軍節度使河北河東燕
山府路宣撫使知燕山府郭藥師為檢校少保同知
府事詔藥師入朝禮遇甚厚賜以甲第姬妾命貴戚
大臣更互設宴又召對于後苑延春殿藥師拜庭下
泣言臣在虜中間趙皇如在天上不謂今日得望龍
顏帝深褒稱之委以守燕對曰願效死又令取天祚
以絕燕人之望藥師變色言曰天祚故主也國破出
走臣是以降陛下使臣畢命他所不敢辭若使反故
主非所以事陛下願以付他人因涕泣如雨帝以為
忠解所御珠袍及二金盆以賜藥師出諭其下曰此
非吾功汝輩力也即剪盆分給之加檢校少傅歸鎮
燕山府路轉運使呂頤浩言開邊極遠其勢難守雖
窮力殫財無以善後又奏燕山河北危急五事帝怒

命貶官而
職任如故

金以遼平州為南京命張穀留守

遼平州人張穀為遼興軍節度副使遼主之走山西也平州軍亂殺其節度使蕭迪里穀撫安亂者州民推穀領州事耶律淳死穀知遼必亡乃籍壯丁五萬人馬千匹練兵為備蕭德妃遣時立愛知平州穀拒弗納金人入燕京訪穀情狀于康公弼公弼曰穀狂妄寡謀彼何能為當示以不疑金人招時立愛赴軍前加穀臨海軍節度仍知平州既而尼瑪哈又欲先下平州擒張穀公弼曰若加兵是趣之叛也公弼請自往覘之遂見穀穀曰契丹八路七路已降今獨平州存敢有異志所以未解甲者防蕭幹耳厚賂公弼使還公弼還言于尼瑪哈曰彼無足慮也乃升平州為南京加穀試中書門下平章事判留守事

廣義

嗚呼遼之亡也若土崩瓦解並無一人忠義相與維持固守可哀也已當是時也七路已

降獨平州一路未降為張穀者尚可傳檄四方招
集勤王若顛木之有鬻藥可也今乃反日所以未
解甲者防蕭幹耳觀此一言則知遼之諸臣共以
遼國特贈金人也厥罪可勝誅邪故綱目大書曰
金以遼平州為南京命張穀留守以見張穀者遼
之守臣也金人不廢一鏃不遺一矢命遼守臣守
遼之土而已噫非金之滅遼遼乃
自滅之耳學者味之其義見矣

二月以李邦彥趙野為尚書左右丞○遼延禧追廢淳
為庶人殺淳妻蕭氏

遼主聞南京破出奔四部族蕭德妃來見遼主怒殺
之追降淳為庶人降其屬籍而赦其黨蕭幹奔奚

廣義

或曰秦晉國王淳遼主之叔也蓋嘗稱帝而
后迺其妻矣綱目何以不帝不后而名之氏

之邪曰不然周公之與成王以親言則周公叔父也成王猶子也以分言則自有君臣尊卑之禮截然而不可紊者也故書稱周公作誥而傳之者則曰周公傳王命以告多士所謂天無二日民無二王是也烏有一君在而自立為君者哉其篡逆之惡莫過于此綱目嚴毅剛正而直書于冊者誅首惡之法律也可畏哉

三月遣使如金

趙良嗣至燕謂金主曰本朝徇大國多矣豈平灤一事不能相從邪金主曰平灤欲作邊鎮不可得也遂議租稅金主曰燕租六百萬止取一百萬不然還我涿易舊疆及常勝軍我且提兵按邊良嗣曰本朝自以兵下涿易今乃云爾豈無曲直邪且言御筆許十萬至二十萬不敢擅增乃令良嗣歸報金主謂之曰

過半月不至吾提兵往矣時左企弓嘗以詩獻金主
曰君王莫聽捐燕計一寸山河一寸金故金人欲背
初約要求不已良嗣既還金間遠主謀復故地乃悉
斷盧溝北橋梁焚次舍以防之良嗣行至雄州以金
書遞奏其畧言貴朝兵不克夾攻特因已力下燕所
以拘稅今據燕管內每年租六百萬貫良嗣等稱御
筆許二十萬以上不敢自專其平灤等州不在許限
儻務侵求難終信義仍速追過界之兵王黼欲功之
速成乃請復遣良嗣自雄州再往使許遼人舊歲帑
四十萬之外每歲更加燕京代稅錢一百萬緡及議
畫疆與遣使賀正旦生辰置榷場交易金主大喜遂
使尼楚赫等持誓書草來許以燕京及六州來歸而
山後諸州及西北一帶接連山川不在許與之限帝
曲意從之遣盧益及趙良嗣等持誓書往至涿州金
古紳等先索書觀之言其字畫不謹令易之益言帝
親書所以示尊崇于大國也金人不聽凡至汴京更

易者數四金人又言近有燕人趙溫訊等逃出南朝
須先還方可議交燕地良嗣諭宣撫司縛送溫訊于
金既至尼瑪哈釋其縛而用之金
人又求糧良嗣許以二十萬石

發明

抑考童貫再舉伐燕不克成功懼得罪故遣使如金求夾攻燕至于克燕乃獨金人之力

貫無分毫之功今馬屑屑請求燕地金人曷得不
索燕租而遽爾與之邪且爭地以戰本為租稅以
克國用既以租稅與人其地將焉用之况租稅既
以與彼則彼為主我為客矣夫所賴乎主中國者
以我為主而四方俱受制也今反以租稅與人而
已徒取其地不免俯首乞憐何其惑與是則索燕
租者金之上策與燕租者宋之下策耳何也蓋敵
情貪狡稍不如意則必敗盟所以他日致其興兵
之辭者其原
蓋出于此

夏四月金人來歸燕及涿易檀順景薊之地詔童貫蔡攸

班師

金人既遂所欲乃使楊璞以誓書乃燕京六州來歸而營平灤三州終以非石晉所賂契丹之地不預焉詔童貫蔡攸入燕交割時燕之職官富民金帛子女皆為金人所掠而東惟存空城而已尼瑪哈猶欲止割涿易金主曰海上之盟不可忘也我死汝則為之貫等奏燕城老幼迎謁焚香稱壽帝為之曲赦兩河燕雲命即日班師

燕雲命即日班師

發明

來歸者金人心服而歸之也然曷為心服而歸之宋求地于金惟遂欲速之心不顧禮之

可否所欲必得無請不從增歲幣納稅租而燕之子女玉帛皆為金人所取所得者不過空城而已

以有用之財易無用之地竊謂徽宗不取也春秋
書齊人來歸鄭師謹龜陰田君子美之定公齊侯會
于夾谷孔子攝行相事以禮相見却齊俘拒兵車
之命而罷宴享之攝由是齊侯歸三邑以謝過此
所謂心服而歸之也徽宗屈己徇金僅得燕地夫
豈心服而歸之乎然宋既求于金而金樂然與宋
是亦心服者故其書法如此
美惡不嫌同辭其義自見

廣義

觀綱目所書則知金人所得者實效也宋之
所得者虛名也實效與虛名其所得者奚翅

什伯千萬哉宋之君臣謀國如此其左尚何以勝
人為望邪噫已不可欺也徽宗此舉是欺已哉既
欺乎已而欲人之
不已欺者難矣

金襲遼延禧于青塚獲其子女族屬從臣以歸延禧邀

戰敗績走雲中

金以幹魯為都統幹里雅布副之使襲遼主于陰山至居庸獲林牙耶律達實幹魯使幹里雅布尼楚赫羅索以兵三千分道襲遼主將至青冢遇泥濘不能進幹里雅布以繩繫達實使為鄉導趨遼主營幹魯等大軍繼至時遼主往應州其子秦王定許王寧及諸從女并從臣皆被執盡失輜重萬餘乘惟太保特默格竊遼主次子梁王雅里及長女特哩乘軍亂出赴遼主軍得免幹魯兵至索勒敏為書招遼主遼主自金城來間金人以所獲東去率兵五千餘邀戰于白水瀲幹里雅布以兵千餘敗之遼主遁去金人獲遼主長子趙王實訥埒追奔二十餘里盡得其從馬別獲遼牧馬萬四千匹車八百乘遼主使人持兔紐金印偽請降于金而西走雲中幹里雅布復以書招遼主諭以石晉北遷事遼主答書乞為弟若子量賜土

地幹里雅

布不許

發明

輕行而掩之曰襲獲者賤之之辭書獲其子女族屬從臣以歸惡其不能死難賤而絕之

也不曰敗而曰敗績謂與讐戰雖敗亦榮也延禧雖值喪亂而不忘仇敵此所以嘉其志而不絕焉耳較諸偷生迎降服為臣敵者豈不大相懸絕哉

五月以楊時為通英殿說書

時入對言于帝曰熙寧之初大臣文六藝之言以行其私祖宗之法紛更殆盡元祐繼之盡復祖宗之舊熙寧之法一切廢革至紹聖宗寧抑又甚焉凡元祐之政事著在令甲皆焚之以滅其迹自是分為二黨縉紳之禍至今未殄臣願明詔有司條具祖宗之法著為綱目有宜于今者舉而行之當損益者損益之

元祐熙豐姑置勿問一超于中而已又言燕雲之師
宜退守內地以省轉輸之勞募邊民為弓弩手以殺
常勝軍之勢又言都城無高山巨浸以為阻衛士人
各異心緩急不可倚仗君臣警戒正在無虞之時帝
首肯之除
通英說書

廣義

觀夫龜山人對之言其救時之策莫良于此
夫何徽宗但首肯之未聞其舉而行之也孔

子曰說而不繹從而
不改其微宗之謂歟

以王黼為太傅總治三省事鄭居中為太保蔡攸為少
師進封童貫為徐豫國公居中辭不拜

王黼竭天下之財以北征僅得七空城至是率百官
表賀詔以收復燕雲宰執皆進位而命王黼總治三

省事賜王帶以趙良嗣為延康
殿學士居中自稱無功不拜

發明

徽宗竭天下之財力得七郡之空城論功行
賞不亦謬哉惟居中自稱無功不受封爵庶

幾彼善于此者矣據
事宜書美惡自見

廣義

燕地之祖不入于金則燕雲之地決不可得
也故王黼羣奸欲速邊功之成所以許歲幣

許租錢不惜國體然後得復此燕雲空虚之地夫
何徽宗不此之察反加王黼等爵位之尊而不知
國實被其潛賁也惜哉曰居中何以辭而不拜乎
曰羞惡之心人皆有之賢者能弗喪耳居中有焉

遼延禧奔夏都統蕭特烈等以梁王雅里稱帝

夏主季乾順遣使請遼主臨其國遼主從之中軍都
統蕭特烈等切諫不聽遂渡河次于金肅軍北遣使

冊乾順為夏國皇帝人情惶懼不知所為特烈陰謂
即律元直曰事勢如此億兆離心正我輩效節之秋
不早為計奈社稷何乃共弑遼主第二子梁王雅里
走西北部三日遂立為帝改元神歷以特烈為樞密
使特默格副之雅里性寬大惡誅殺
復亡者答之而已自歸者即官之

發明

奔者急詞也以稱帝何不宜稱者也然雅里
延禧之子延禧奔夏人情惶懼況喪亂之時

立子以安人心乃權而得中者曷為以僭稱書蓋
肅宗亦明皇之子明皇奔蜀肅宗即位于靈武君
子尚以篡位為嫌是時延禧未聞有傳位之事蕭
特烈等睨禧奔夏即立梁王是蓋與篡國之臣特一
間耳其與廟輒拒父之意何殊哉
據事直書不再貶而其義自見矣

廣義

自古國君之所以得常勝夫敵國者以其勢在
我也遼主奔夏則是依夏為主而其勢在于

夏馬今而反冊夏主何其不知量哉易曰利用為
依遷國遼人何足以知此其不至于魏武之于宇

文泰者

幾希矣

奚和勒博為其下所殺

和勒博為郭樂師所敗一軍離
心其黨耶律阿古咥等遂殺之

廣義

昔者安史反逆皆死于其子天理固為甚明
和勒博乘亂僭竊尤而效之故為其下所殺

綱目書之為斯世戒亂臣
賊子尤欲稱亂不已乎

金遣使如夏

幹里雅布趨天德開夏迎護遼主遼主渡
河乃遣書于夏使執送遼主且許割地

六月金張穀以平州來歸

金驅遼宰相左企弓虞仲文曹義勇康公弼同燕京大家富民俱東徙燕民流徙道路不勝其苦過平州遂入城言于張穀曰左企弓不能守燕致吾民如是公今臨巨鎮握強兵盡忠于遼使我復歸鄉土人心亦惟公是望穀遂召諸將領議皆曰聞天祚兵勢復振出沒漠南公若仗義勤王奉迎天祚以圖興復先責左企弓等叛降之罪而誅之盡歸燕民使復其業而以平州歸宋則宋無不接納平州遂為藩鎮矣即後日金人加兵內用營平之軍外籍宋人之援又何懼焉穀又訪于翰林學士李石亦以為然穀乃遣張謙帥五百餘騎傳留守令召左企弓虞仲文曹義勇康公弼至灤河西岸數企弓等十罪皆縊殺之穀乃稱保大三年盡天祚像朝夕謁事必告而後行稱遼官秩榜諭燕人復業恒座為常勝軍所占者悉還之

燕民既得歸大悅李石更名安弼偕故三司使高黨至燕京說王安中曰平州形勝之地張穀總練之才足以禦金人安燕境幸招致之毋令西迎天祚合蕭幹也安中深納之令安弼黨與至汴以聞帝以手札付同知燕山府事詹度第令羈縻之而度促穀內附穀乃遣張鈞張敦固持書來請降王黼勸帝納之趙良嗣諫曰國家新與金盟如此必失其懽後不可悔不聽良嗣坐削五階而詔安中及詹度厚加安撫與免三年常賦穀聞之自謂得計

發明

張穀何以不書叛背金向宋理之正也况張穀本契丹之臣又與女真種落不同其歸宋者欲倚之以復遼仇耳是蓋心服而歸之者也雖然招亡納叛清朝不取宋納張穀而遂為金人用兵之端豈非貪利忘害之大病乎迨至殺穀畀金不惟失國體抑且將士離心矣蓋察理不明而有

此弊豈不
深可惜哉

廣義

張穀既以平州降金復以之歸宋則其中無
所主而聽命于人者也曾謂忠臣義士有是

哉若穀者其見利
忘義之小人也

鄭居中卒以蔡攸領樞密院事○秋七月童貫致仕以

內侍譚稹為兩河燕山路宣撫使

貫與蔡攸歸自燕頗失上意王黼梁師成共薦稹代
貫交雲中之地稹至太原招朔應蔚諸州降人為朔
寧軍

發明

嗚呼觀徽宗無歲不以宦官為用迭興迭滅
其禍相尋于無窮烏得而不亂哉是時童貫

甫令致仕而代者已踵其後故書以譚禎為兩河
燕山路宣撫使則是童貫雖罷而實未嘗罷也天
下何由而
泰乎吁

廣義

仕者與君共天位食天祿者也非其德足以
正君善俗其才足以修政立事者不預焉豈

有刑餘奴隸之賤而可以致仕名之乎且又以譚
禎代貫者予以見宋之邊事皆付之閭閻豈雖欲
不亡
得乎

禁元祐學術

中書言福建印造司馬光等文集詔令毀板凡舉人
傳習元祐學術者以違制論尋又詔蘇軾黃庭堅等
獲罪宗廟義不戴天片文隻語並
令焚毀勿存違者以大不恭論

廣義

抑觀元祐學術通天地質鬼神闢奸邪扶正直為上為德為下為民萬世仰如山斗所謂

無間然者也諸賢何負于徽宗前既禁其學術矣又禁以元祐學術政事授業者今又再禁其學術嗚呼徽宗之世所謂通天地而閉塞焉者也一有正直之士眾必鋤治蔽揚使其不能容足於朝非竄逐則安置朝進實封慕承貶詔其視學術之正如元祐者毒如仇家則是通國皆非元祐學術者也故曰不有君子其何能國宋其殆矣

八月朔日食○遼都統蕭幹自稱奚帝引兵破景薊州遂攻燕與郭藥師戰敗走死詔加藥師太尉

金人既陷燕京幹就奚王府自立為神聖皇帝國號大奚改元天嗣時奚人譏幹出龍盧嶺攻破景州又

敗常勝軍于石門鎮陷薊州寇掠燕城其鋒銳甚有涉河犯京師之意人情洶洶頗有謀棄燕者已而藥師大破其衆乘勝窮追過盧龍殺傷大半幹適去尋為其下所殺傳首京師詔加藥師太尉

金阿古達死弟烏奇邁立

金主去燕京六月有疾命尼瑪哈為都統普嘉努幹魯副之駐兵雲中以備邊而還八月至部堵濼而卒年五十六古倫貝勒舍音等請安班貝勒烏奇邁即位更名晟改元天會以舍音為安班貝勒幹布為古倫貝勒相與輔政幹布太祖庶長子也九月葬太祖于海古勒城西

發明

春秋吳楚之君書卒而不書葬避其號也阿古達世為遼臣率精銳之兵肆意侵伐其僭

號則曰稱帝其舉兵則曰金人其卒則斥名而書死皆所以正其本國之名而不使其同于中國諸

侯之稱耳知乎此
始可與論綱目矣

廣義

阿古達國王也何
以書死蓋謹之也

冬十月遼雅里死蕭特烈等復立即律珠拉為帝

珠拉聖

宗孫也

詔建平州為泰寧軍以張穀為節度使

金人間穀叛遣棟摩將三千騎來討穀率兵拒之于
營州棟摩以兵少不交鋒而退穀遂妄以大捷聞朝
廷拜穀節度使
犒賞銀絹數萬

十一月幸王黼第觀芝

帝由便門過梁師成家復來黼第因大醉不能語夜漏上五刻乃聞龍德宮複道小門以還內侍十餘人執兵接擁是夜諸班禁從皆集教場備不虞幾至生變翌日猶不御殿殆半日人心始稍安祖宗以來臨幸未之有也

發明

凡觀譏之也幸王黼第觀之甚譏之方是時金人強悍肆意侵陵既敗遼師勢益猖獗因

納張穀每欲加兵此乃敵國外患臨深履薄恐懼修省之時具君當倚于法家拂士以德修國政其臣當責難陳善以禮格君心內用賢才外弭強敵保祖宗之業若弗暇也今乃施施然安于不競無憤恥自強之志惟無益之物是觀是玩及金人入寇工下離心顧欲徵兵拒敵不亦晚乎綱目之法制治于未亂保邦于未危是以深惡徽宗之失德明其義者然後知君子作綱目于一臺園之築一

無益之觀必謹而書以重民力以譏廢政其弭亂持危固結人心之慮遠矣

金人襲平州張穀奔燕山平州人殺金使以拒守

棟摩無功而退金主使幹里雅布督棟摩攻平州會張穀聞朝廷犒賜將至喜而迎幹里雅布乘其無備襲之與穀戰于城東穀敗宵奔燕山王安中納而匿之平州都統張忠嗣及張敦固出降金金遣使與敦固入諭城中城中人殺其使者立敦固為都統閉門固守

發明

金稱人浸強也政和五年擊遼兵于達魯噶城大敗之固已強矣然獨舉其號者始見綱

目則本其僭竊之罪名其侵奪之非著王法也宣和元年來聘嘉其慕義乃以人書四年襲遼軍惡其叛主復以號舉至是伐張穀也亦書人者豈許其伐罪而人之乎據中原僭大號逼宋室擅威權

其所由來者漸矣其與春秋
書楚人伐鄭義同後皆倣此

詔殺張穀函首以畀金

金人以納叛來責朝廷初不欲發遣金人索之益急
王安中取貌類穀者斬其首與之金曰非穀也遂欲
以兵攻燕安中言必不發遣懼起兵端朝廷不得已
令安中繼殺之函其首併穀二子送于金于是燕降
將及常勝軍士皆泣下郭藥師曰金人欲穀即與若
求藥師亦將與之乎安中懼因力求罷召為上清寶
籙宮使以蔡靖知燕山府事自是降
將卒皆解體而金人遂用此與師矣

發明

凡事順來者當以逆料逆來者當以順揆穀
之背金歸宋此固順來者也為宋計者則必
熟思審處意以穀之背主歸來彼必見惡猶我叛
人之歸彼亦我之所惡也責人之心責已恕已之

心恕人由是拒之而弗納則彼此相安而釁端絕矣夫何既利其土地而納之復因其來索而殺之噫何故相率來降以求殺邪嗣此燕之降將叛卒怨憤泣下人無固志金亦藉此以為用兵之端豈不深可惜哉國必自伐然後人伐之此之謂也故直書詔殺張穀函首畀金所以深罪之耳

廣義

嗚呼宋人可謂識見短而中情怯者也當張穀以平州來歸之日君臣同心揆諸已曰張

穀反覆小人也既叛于遼復叛于金前既以平州降金則平州乃金之所有者也今以之歸我則金必仇于我使或加兵而無禮于我我將何以禦之度其可禦受之可也不可禦不受可也今韓里雅布遣人以納叛來責則直在金而曲在于宋也明矣由是一聞金欲加兵遂殺張穀以塞其責此所以示弱于金而金人得以指為他日興兵之由也臣故曰宋人可謂識見短而中情怯者也

遼珠拉及蕭特烈為亂兵所殺○金人來歸武朔州

朝廷以山後諸州請于金金主新立將許之尼瑪哈自雲中至言于金主曰先帝初圖宋協力攻遼故許以燕地宋人既盟之後請加幣以求山西諸鎮先帝辭其幣而復與之盟曰無匿逋逃無擾邊民今宋數路招納叛亡累疏叛人姓名索之童貫不遣盟未期年今已如此萬世守約其可望乎且西鄙未寧割付山西諸郡則諸軍失屯據之所將有經畧或難持久請勿與之金主遂遣使止以武朔二州來歸

廣義
大凡理勢在我則請求得遂理勢在彼如請求何觀尼瑪哈之言則理勢之在于金也什其九矣使金不與武朔亦無如之何既與武朔宋其幸焉

甲辰六年春正月夏稱藩于金金以邊地畀之

夏得金書遣巴哩公亮奉誓表請以事遂之禮稱藩于金且受割賜之地尼瑪哈承制割下塞以北陰山以南伊實伊喇部圖嚙潔西之地與之自是兩國信使不絕

三月金人來索糧不與

金遣使詣宣撫司索趙良嗣所許糧二十萬石譚稹曰二十萬石豈易致邪良嗣口許豈足憑也遂不與金人由是大怒

發明

敵國之情貪婪無厭是以宜疎而不宜親宜遠而不宜近也宋以欲速之心共議攻遼之

策既許燕租復吝不與則是中國失信于敵人而曲在中國矣昔石敬瑭借兵契丹事之甚謹其後子孫少逆社稷為墟宋殷監不遠何以復循故轍乎此蓋小人謀國不臧以貽大患釁端既啓誰復

救哉愚以為清斯濯纓
濁斯濯足自取之也吁

廣義

書曰朕聖讒說殄行詩曰取彼譖人孔子之
遠佞人孟子之惡利口無非利其為國之害

故也彼趙良嗣者本燕人無行之馬植也前既以
圖燕之下策妄進于朝今又以糧餉之重事輕許
于金是則議圖燕者良嗣也許糧餉者亦良嗣也
嗟乎宋與金終不能解仇釋怨而貽禍之烈者由
乎徽宗輕信讒人也傳曰
辟則為天下僂矣信哉

閏月京師河東陝西地震

宮殿門皆搖動有聲河東陝西尤甚蘭州地及諸山
草木悉沒入而山下麥苗皆在山上詔右司郎中黃
潛善按視潛善不以實聞上
意乃安遣潛善為戶部侍郎

夏四月起復李邦彥為尚書左丞

時邦彥居父

喪纔兩月

發明

書起復者譏詞也非有金革之事奪人之喪自奪其喪皆非也邦彥姦邪未聞黜逐今乃

仍起之為尚書左丞此何義也是時徽宗惑于邦彥之欺蔽所為若此悖禮甚矣此事觀之其失自見

六月金人陷平州

張敦固出兵與金人戰大敗州民猶不肯降金主召幹里雅布還下詔招撫棟摩克克平州執敦固殺之

科免夫錢

欽定四庫全書

御批續資治通鑑綱目

八

自得燕地悉出河北河東山東之力以往饋官軍率
十數石致一石纔一年三路皆困王黼乃請詔京西
淮南兩浙江南福建荆湖廣南措置調夫各數十萬
並納免夫錢每夫三十貫委漕臣限督之又詔宗室
戚里宰執之家及宮觀寺院一例均數于是
偏率天下所得纔二十萬緡而結怨四海矣

秋七月置璣衡所

王黼言頃得方士璣衡之書足以察七政
詔置璣衡所以黼及內侍梁師成領之

發明

是時天下惶懼四海離心宋之君臣正宜更
相戒飭一新政令而近續天命焉顧乃溺于

晏安耽于逸樂惟知自奉而不知瘠民科免夫錢
而結怨四海矣置璣衡所而朝政愈煩矣故曰禹
湯文武以仁得之桀紂幽厲以不仁失之徽宗寵
信姦回變更法制日積月累漸迫危亡既無禹湯

文武之仁而有桀紂幽厲之暴天下之亂不古可知也君子豈不深為徽宗惜哉脩書于冊其義自
見矣

遼延禧復東勝諸州至武州與金人戰敗走山陰

遼主復渡河居于圖魯卜部耶律達實自金來歸遼主責之曰我在汝如何敢立淳達實對曰陛下以全國之勢不能一拒敵棄國遼遁適使黎民塗炭即立十淳皆太祖子孫豈不勝乞命于他人邪遼主無以答賜酒食而赦之金襲遼主營遼主北走瑪克實迎遼主至其部事之謹遼主遂得至烏爾古德呼勒部遼主得耶律達實及瑪克實之兵自謂有天助再謀出兵收復燕雲達實諫曰向以全師不謀戰備使舉國皆為金有國事至此而方求戰非計也當養兵待時而動不可輕舉遼主不從遂及於敗

發明

凡與仇戰皆春秋之所予故變文書復所以嘉其志而樂予之者也夫金遼世仇不共戴

天延禧不競遂失全國今能大振萎靡恢復諸州則其中心亦非甘于自棄者蓋復仇之心無時焉而少忘也功雖不就其志可尚戰而敗走庸何傷乎較諸輿櫬面縛服為臣僕豈可同日而語哉此綱目所以特書而亟予之耳

八月譚稹罷復以童貫領樞密院事兩河燕山路宣撫使

初金人以拓跋故地雲中二千里遺夏止以武朔二州來歸至是夏人舉兵侵武朔地界譚稹遣兵擊之兵數交夏人未即退聽又金人以朝廷納張穀不給糧遂攻應蔚遼守臣朝廷罪稹借置乖方詔致仕以貫代之時遼主延禧在夾山帝欲誘致之始遣一番僧齋御筆絹書通意及延禧許歸遂易書為詔許待

以皇弟之禮位燕越二王上築第千間女樂三百人
延禧大喜貫之是行名為代頤交割山後土地其實
已約延禧來降
自往迎之也

發明

前知童貫之非才罷之而用譚稹此惡譚稹
之無畧罷之而用童貫何謬妄之若是耶夫

天下禍亂近在目前皆童貫等陰賊于內蔡京等
陰賊于外誠王法之所不原者徽宗溺愛不明以
為貴優才幹復舉用之以之領事樞密以之宣撫
邊方而謀臣戰將一切擯棄殊不知用貫一日而
天下壞亂一日也蓋由胸中邪正不分是非無別
知有童貫而不知有社稷焉耳徽宗之心何心哉

赦

以復雲

燕也

九月以白時中為太宰李邦彥為少宰趙野宇文粹中
為尚書左右丞蔡懋同知樞密院事○冬十一月王黼
有罪免

黼位元宰每陪曲宴親為俳優鄙賤之役以獻笑取
悅太子聞而惡之黼以鄆王楷有寵陰為畫奪宗之
計未成及帝幸其第觀芝而黼第與梁師成連牆穿
便門往來帝始悟其與師成交結狀還宮眷侍頓衰
李邦彥素與黼不協陰結蔡攸共毀之會中丞何栗
論黼姦邪專橫十五事遂詔黼致仕其黨胡松年等
皆免焉

廣義

分注載詔黼致仕嗚呼刑與禮一致也故尚
書傳曰禮刑一物也失禮則入刑蓋有罪者

加之以刑無罪者加之以禮此古今之通議也且王黼欺君誤國其罪不可以縷數既云有罪則當依律抵之烏可以禮去官邪徽宗馭臣而措置顛倒若此譬則遇寒疾不汗而昏潰之甚者也不亡得乎故綱目于分注止載王黼致仕而大書則曰有罪者誅奸佞也

置講議財利司罷應奉局

自蔡京倡豐亨豫大之說勸帝窮極侈靡久而帑藏空竭言利之臣殆及秋毫宣政以來王黼專主應奉培植剝橫賦以羨為功所入雖多國用日匱至是宇文粹中上言祖宗之時國計所仰皆有實數量入為出沛然有餘近年諸局務應奉司妄耗百出若非痛行裁減慮智者無以善後于是詔蔡攸就尚書省置講議財利司除茶法已用定制餘並講究條上攸請內侍職掌事干宮禁應裁省事委童貫取旨由是不急

之物無名之費悉議裁省帝亦自
罷諸路應奉官吏減六尚歲貢物

發明

古之足財用者傳有之曰國無遊民則生之
者衆矣朝無倖位則食之者寡矣不奪農時
則為之者疾矣量入為出則用之者舒矣夫如是
則財安有不足者乎徽宗惑于權奸窮極侈靡虛
內事外費出無經生之者既寡食之者既衆為之
者不疾用之者不舒則國用竭矣雖講而議之復
何益哉孟子曰王何必曰利亦有仁義而已矣人
主觀此則知侈用必至于傷財傷財必至于害民
故愛民必先于節用而無益妄費不可形之于
念慮也知乎此然後可論興衰撥亂之說也

廣義

是舉也美則美矣君子
惜之蓋亦啞齋無及矣

十二月詔蔡京復領三省事

王黼既致仕朱勔力勸用京帝從之京自是四當國
目昏眊不能視事悉決于季子條凡京所判皆條為
之至代京入奏之條每造朝侍從以下皆迎揖咄囁
耳語堂吏數十人抱案以從由是恣為姦利竊弄威
柄驟引其婦兄韓偓為戶部侍郎媒孽密謀斥逐朝
士創宣和庫式貢司四方之金帛與府藏之所儲盡
拘括以實之為天子私財白時
中李邦彥等惟奉行文書而已

廣義

古者四十始仕七十致仕蓋仕始于四十者
精力強壯足以有為而能幹君之蠱況不為

他岐之惑也仕致于七十者精力衰耗不能有為
而致匪躬之節況當全考終乎此為賢人士夫出
處而設彼其藏奸蓄穢以妾婦之道事君者不與
焉歷觀蔡京諂事徽宗其于精力強壯之時固未
嘗以道事君至其末年精力衰耗則昏惑愈甚邪
僻愈滋直其不顧廉恥而所為又浮于前也今蔡

京既已致仕而徽宗復起之者譬猶酒癖膏肓而又加以酖毒是自速其斃也而由人乎哉

河北山東盜起

時轉糧以給燕山民力疲困重以鹽額科歛加之連歲凶荒于是饑民並起為盜山東有張仙者眾至十萬又有張迪者眾至五萬河北有高托山者號三十萬自餘二三萬者不可勝數

都城有女子生髭詔度為道士

郡城中酒保朱氏女忽生髭長六七寸疏秀甚美宛然一男子特詔為道士又有賣青果男子孕而誕子

發明

凡書有者所未嘗有者也生髭乃男子之常理女子生髭此所以反常而為異耳夫女子

陰類而生髭則是女變為男陰化為陽之象也君子為陽小人為陰茲既陰化為陽則小人竊發之

機兆矣陰陽謹告之驗明矣徽宗目擊茲異罔肯省身度為道士夫復何說噫曾是以為應變之策乎既而河北山東相繼盜起而女真由是乘之天下擾亂弗克支矣書之足以著其垂亡之徵也

乙巳七年春正月遼延禧如党項二月至應州金將羅索獲之以歸

遼主畏中國不可仗謀奔西夏會党項小呼嚕遣人請遼主臨其地遼主遂趨天德過沙漠金兵忽至遼主徒步出走乘從者馬得脫途次絕糧從者至嚙冰雪以濟饑過天德至夜將宿民家紿曰傾騎其家知之乃叩首跪而大慟潛宿其家居數日喜其忠遙授以節度使遂趨党項以小呼嚕為西南面招討使總知軍事二月至應州新城東六十里為金將羅索等所獲遼遂亡

發明

春秋之法內入國而以其君來外滅國而以其君歸皆服而以之易詞也書獲雖云賤詞

然延禧無降服之狀強獲以歸而遂志也或以為延禧亡國之君故其斥名書獲以罪之曰非也亡國之詞有三死之上也走之雖非猶有恥焉降則為下矣金人恃強叛遼凡十有四年而見滅延禧在顯沛流離之中尚圖興復罔肯降仇不得已而為羅索所獲非伏為臣敵之比也然不曰遼亡者外而不內貶之之詞也延禧有社稷之仇不與共天下播越沙漠效死不降至于力屈就擒其志可尚也則延禧為君之道得矣

廣義

自古敗亡之國未嘗無死節之臣何遼之亡也寂無一人焉蓋由天祚荒淫匪仁匪義有

以導之故其施報至于如此也孟子曰君之視臣如手足則臣視君如腹心君之視臣如犬馬則臣

視君如國人蓋以此耳觀其自女真擾攘以來其間但見有以所部降者有以謀反誅者有據遼陽以叛者且壽春遼東渤海遼之名郡也降于金若建瓴然節義之士無間焉顯乾懿豪徽成川惠遼之藩屏也陷于金若走墉然節義之臣不見焉耶律托卜嘉上京留守也以城降金而無固守之心耶律伊都遼之懿親也以怨降金而懷反噬之毒走雲中而遺金印也臣下輕之如浮雲適夾山而立新主也臣下棄之如敝屣祥穩之家遼主奔之而無救援之意耶律達實遼主逆之而起自立之衆叛親離卒至于亡滅可哀也已易曰來馬班如泣血漣如其天祚之謂乎

遼耶律達實稱帝于奇爾滿

先是達實以諫遼主不從遂殺北院樞密蕭伊蘇自立為王率衆西走至哈屯城駐于北庭都護府會西鄙七

蔡京
流依
圖登
其奸
黜逆
始逐
矣用
不可
始也

州十八部王諭以興復事得精兵萬餘置官吏立排
甲具器械又遺書假道于回鶻王必里克必里克得
書即迎至邸願質子孫為附庸送至境外所過敵者
勝之降者安之兵行萬里歸者數國獲牛羊駝馬不
可勝計至塔賓干西域諸國舉兵十萬號呼爾察來
拒戰達實分所部為三軍進擊大敗之僵屍數十里
駐兵塔賓干凡九十日回回國王來降貢方物又西
行至奇爾滿羣臣共冊立達實為帝改元延慶上尊
號曰天祐皇帝妻蕭氏
為昭德皇后是為西遼

發明

時延禧既獲遼祚已亡達實據有土地稱帝
改元而必于延禧既獲之後使遼之統緒不

絕祀典有歸其志亦可嘉尚已然達實稱帝即書
于下者又以見達實有紹續本國之意故亦書而
及之也其與五代漢劉崇稱帝
于晉陽同意君子宜並觀之

以庸劣之
附小人以
進即當燭
回之意豈
其誤國而
之已無及
人之道哉
不慎之於

廣義

觀夫達實論七州十八部王之言若有忠肝
義膽恢復疆宇之志者也至于在道間關降

附者衆似可以回轅東向以復不共戴天之仇今
乃鼓行而西至于窮沙極漠之地何哉其心不過
欲自帝耳于時東歸烏能帝哉故綱目書稱帝者
所以著達實無居之心也詳味書法其義得矣

夏四月勒蔡京致仕

蔡條鍾愛于京擅權用事其兄攸嫉之數言于帝請
殺條帝不許白時中李邦彥亦惡條乃與攸發條奸
私事帝怒欲竄之京力丐免乃止勒停侍養因安置
韓偓于黃州褫條侍讀發賜出身敕欲以撼京而京
猶未有去志帝乃命童貫詣京令上章謝事貫至京
泣曰上何不容京數年當有相譏諧者貫曰不知也
京不得已以章授貫帝命詞臣
代京作三表求去乃降詔從之

發明

勅者強逼之詞蔡京貪位慕祿進不知止前書詔致仕此書勅致仕其義可見矣蓋君子

難進小人易盛乾之初九陽始萌坤之初六陰始生陽始生則曰潛龍勿用言方隱而未可以進也陰始生則曰履霜堅冰至言雖微而必至于盛也觀聖人之言可以知君子之難進小人之易盛也蔡京再相專權自恣父子構隙遂成仇讐誠不可以帥正百僚也直書曰勅則昏夜乞哀苟焉無恥而進不知止之情益著矣人臣視此寧無警哉

廣義

嗚呼父子兄弟天合者也君臣義合者也蔡京之與二子其逆理違天也特甚徽宗獨不

思曰條攸之親弟也親弟尚欲殺之其能忠于我乎京于二子尚不能教之其能以道事我乎一思之間羣邪立辨其于斥逐三人也何有惟其不然所以成伊誤國欺君之惡耳况乎人之所以為人

者莫大乎恥也故曰存之則進于聖賢失之則入于禽獸觀京泣訴童貫何其無恥之甚邪易曰勿用取女見金夫不有躬無攸利蓋言丈夫不可用此無恥之女猶人君不可用此無恥之臣也徽宗何足以知此書曰勒者所以著蔡京之貪戀無恥也

復元豐官制

詔行元豐官制復尚書令之官虛而不授三公但為階官毋領三省事

六月封宦者童貫為廣陽郡王

帝援神宗遺訓能復全燕之境者昨土錫以王爵封貫為王

發明

童貫初見綱目既揭宦者書之自此拜官封爵但書其姓名而已至是又揭宦者書之何

前既正其始此復正其終也尚書云德懋懋官功懋懋賞小人雖有功但賞之以金帛徽宗以其能復全燕之地封以廣陽郡王於乎名器亦倒施矣童貫姦詭奴材初無過人才德伐夏以困關右之民攻遼以疲河北之士庶權姦而小人之道長導奢侈而天子之心荒迹其所為厥罪固赦然歷考漢唐以來閹宦之禍雖云迭盛亦不過假之以兵權寵之以干政而未聞有加以王爵者加以王爵此宋之大病也故綱目特書封宦者童貫為廣陽郡王所以明其不當封耳其旨嚴哉

廣義

分注云神宗遺訓能復全燕之地者昨土錫以王爵惟是之故故童貫急于邊功不恤國

用虛耗市此全燕空地號曰收復所謂設虛名而受實禍也徽宗被其愚惑迷而不悟哀哉况乎宦者封侯穢汙青史至今為識者所笑徽宗之于童貫也殆有甚焉向嘗錫以上公之爵猶未足以為

尊至此加以王爵可謂尊之極矣綱目因之而書
宦者童貫所以著徽宗爵及惡德之失也嗚呼嚴
哉

前寶文閣待制劉安世卒

安世為章惇蔡卞蔡京所忌連貶竄極遠惡地無不
歷之至是卒安世少從學于司馬光平居坐不傾倚
書不草率不好聲色貨利忠孝正直皆取則于光除
諫官在職累年正色立朝其面折廷諍或逢盛怒則
執簡却立俟威少霽復前抗辭旁列者見之蓄縮辟
汗年既老羣賢凋喪畧盡歸然獨存以是名望益重
梁師成用事能生死人心服其賢求得小吏吳默常
趨走前後者使持書唱以即大用默勸為子孫計安
世笑謝曰吾若為子孫計不至是矣還其書不答蘇
軾常評元祐人物曰器之真鉄漢王偁曰君子小人

不兩立君子必惡小人而小人必忌君子此朋黨之論所以興也方元祐之際朝多君子如安世忠直有餘特嫉惡太甚以激小人之怨及章惇得志而流毒縉紳貽患國家朋黨之禍偏于四海嗚呼天下不幸小人竊君之權使生民受敝為君子者宜求其所以勝小人之術而無務于口舌力爭啓其狠戾不肖之心以重天下之不幸庶幾其克有濟乎

發明

凡卒前官錄賢也安世正直立朝不附羣小而為權姦之所嫉貶竄遐方終身弗用豈不

深可惜乎故綱目于其卒而特具其官者皆所以深予之也宋有是人弗克大用徒為之老死擯棄尚可謂有人之國哉吁

秋七月熙河蘭州河東地震

熙河地震有裂數十丈者蘭州尤甚倉庫皆沒

發明

去年閏月書京師河東陝西地震今年書熙河蘭州河東地震蓋地乃陰道而外方小人

則陰類有其事必有其應未有無其事而有其應者以氣合氣以邪感邪而一毫之差忒無有焉是時外方竊發小人盈朝而地道不寧兩見綱目然則災異之來豈可視為泛常而不恤乎能畏天則雖遇異而變祥不能畏天則雖遇祥而化異在乎人君之修為何如耳綱目特書于冊以見人心天道之不可誣也有天下者其可不鑑哉

八月金烏奇邁廢遼延禧為海濱王

遣使以復遼
主來告慶

九月有狐升御榻而坐

時又有都城東門外鬻菜夫至宣德門下忽若迷罔擇荷擔向門戕手且詈曰太祖皇帝神宗皇帝使我來道尚宜速改也邏卒捕之下開封獄一夕方省則不知向者所為乃于獄中盡之

發明

水火兵戎之謂災山崩川竭之謂異是皆害及民物春秋必書徽宗嗣位二紀于茲水火

兵戎之災固多山崩川竭之異不少蓋由逆氣所激因而生之自綱目所書山崩地震日食彗孛大旱大水蝗疫則有之矣然未聞書狐升御榻而坐者御榻至尊極嚴之地狐乃荒原曠野之物以荒原曠野之物居至尊極嚴之地其異滋甚是則春秋之法所必書者蓋遇災而懼當加修省也以狐而升御榻則宋人失據中原之兆明矣變不虛生災不妄作下書金將尼瑪哈斡里雅布分道南侵

其應豈不明且切哉宋之君臣溺于宴安不思警省是以終淪危亡而不可以救藥也吁

廣義

說文曰狐妖獸也昔者楊再思諂佞戴令言賦兩脚狐以譏之徽宗之時諂佞滿朝其最

甚者蔡京父子童貫王黼也觀分注所云豈非趙宋宗社之靈以彰徽宗近佞之惡而欲其改與夫變常之謂怪聖人之所不語者語常而不語變也故曰國家將亡必有妖孽今也狐升御座則是諂佞專權之兆也豈非妖孽之甚者乎厥後汴宋亡于諂佞其兆明矣

冬十月金尼瑪哈斡里雅布分道南侵

初斡里雅布在平州遣人索叛亡戶口朝議弗遣且聞童貫郭藥師治兵燕山斡里雅布請于金主曰苟不先舉伐宋恐為後患金主以為然而未敢輕舉及使者往返既數道路險易朝廷治否府庫虛實漸得

要領而耶律伊都劉彥宗亦言南朝可圖師不必衆
因糧就兵可也及既獲遼主遂即決意南侵以安班
貝勒舍音領都元帥居京師尼瑪哈為左副元帥古
紉為元帥右監軍耶律伊都為元帥右都監自雲中
趨太原遼蘭為六部路都統棟摩為南京路都統劉
彥宗為漢軍都統幹里雅布監棟摩彥宗兩軍戰事自
平州入
燕山

廣義

蓋聞兵出無名事故不成故用兵貴乎有名
也分注載童貫郭藥師治兵燕山不知此兵

何名也然則金人來索戶口叛亡者因宋弗遣而
舉兵則是宋師無名而金人有名矣故曰利人土
地謂之貪兵兵貪者敗不得已而起謂之應兵兵
應者勝觀此則知宋兵貪兵也金兵應兵也一勝
一負其機決于此矣且敵人之擾中國以名實相
副之師臨之尚憂其不服況無名乎曰然則于金

乎何以入寇書
蓋尊中國也

十一月郊

帝纔下壇而密報金將犯界左右秘之日恐妨恭謝
宰相亦不知也及恭謝畢宰相又共匿之以不聞

發明

郊廟常事不書失禮則書甚矣小人愚弄其
君有同兒戲也金人入寇已經踰月此正宵

衣旰食不遑寧處之時而宋之君臣方且從容自
如舉行郊祀謂之何哉考之分注左右秘之恐妨
恭謝宰相知之匿不以聞嗚呼君臣惟事蒙蔽微
宗益肆驕奢欲求天下不亂其可得乎自金人入
寇而天下分為南北矣然則小人之
禍可勝言哉特書曰郊深貶之也

太常少卿傅察使金不屈死之

察為金賀正使至境遇幹里雅布兵脇之使拜且降
不拜左右猝之伏地愈植立反覆辨論不屈遂遇害
察堯俞從孫也十八登進士蔡京嘗欲妻以女拒弗
答平居恂恂然若無所可否及倉猝徇義聞者莫不
壯之後
諡忠肅

發明

使于四方不辱君命此固人臣之高行也傳
察使金挺然不屈反覆辨論畧弗少挫不惟

不辱君命抑且不辱其身矣雖云被害忠何損乎
世有偷生苟免求生害仁而蒲伏丐命于強敵之
前者視察寧不為之顏汗哉故家語曰人臣之節
當君大事惟力所及死而後已察無愧焉綱目特
以全節予之所以為
人臣徇國之一勸耳

詔神師道為兩河制置使

時師道致仕居南山豹林谷金人南下趨召之師
道聞命即東過姚平仲有步騎四千與之俱赴汴

十二月童貫自太原逃歸金尼瑪哈陷朔代州遂圍太

原

先是金人遣使來許割蔚應州及飛狐靈丘縣帝信
之遣童貫往受地至太原間尼瑪哈自雲中南下貫
乃使馬擴辛興宗往使諭以交割地事擴至軍前尼
瑪哈嚴兵以待趣擴等庭參如見金主之禮既畢首
議山後事尼瑪哈曰爾尚欲此兩州兩縣邪山前山
後皆我家地尚復何論汝家別削數城來可贖罪也
汝輩可即去我自遣人至宣撫司矣擴還具言于貫
貫曰金初立國邊頭寧有幾許軍馬遽敢作如此事
邪擴曰彼既深恨本朝結納張瑄又為契丹舊臣所
激故謀報復今宜速作備禦貫不從既而尼瑪哈遣

王介儒色埒默持書至太原責以渝盟納叛等事詞語甚倨貫問之曰如此大事何不素告我色埒默曰兵已興何告為宜速割河東河北以大河為界用存宋朝宗社乃報國也貫聞之氣穢不知所為即欲假赴闕稟議為名遁還京師知太原府張孝純止之曰金人渝盟大王當會諸路將士極力枝梧今大王去人心必搖是以河東與金也河東既失河北豈可保邪願少畱共圖報國兼太原地險城堅人亦習戰未必金便能克也貫怒叱之曰貫受命宣撫非守土也必欲畱貫置帥臣何為遂行孝純嘆曰平生貫太師作幾許威望及臨事乃蓄縮畏懾奉頭鼠竄何面目復見天子乎尼瑪哈引兵降朔州克代州都巡檢使李翼力戰被執罵賊死尼瑪哈遂進圍太原孝純悉力固守

發明

逃者匹夫之事貫居太原金人入寇當與守臣力拒雖死可也幸而敵退苟見免焉即選

將練兵分屯要害則不辱君命矣不能以理自明而反以匹夫之行遁逃苟免趣還京師不亦賤乎特書曰遁以著其幸免而不知命之罪也貫既逃歸宋不能討失政刑書自太原逃歸又以罪宋也童貫既去河東益孤而相繼陷沒浸不克支悲夫徽宗信任童貫猶如腹心而臨難苟免惟恐或後然則閹人之無益于國豈不信哉

廣義

嗚呼國之大事莫戎事若也官者童貫牧羊豎耳曷足以堪大事乎臣聞兩兵相接曰戰

戰敗而走者有之輕行而掩曰襲被襲而遁者有之環其城邑曰圍潰圍而出者有之未聞有敵使方至一見其辭倨傲而遽爾逃歸者也書曰知人則哲能官人此聖帝明王之所難固不可責之徽宗也雖然徽宗非聾非瞽特以私欲蔽錮之深而受其蠱惑耳然一日之內豈無片時天理之呈

露邪童貫日侍徽宗其親昵又非其他宦者之比而不能揣知其臧否之一二其可怪也夫觀分注載張孝純之言足以貽笑千古後世人主欲委大事于閹宦者當以童大王為戒

金幹里雅布入檀薊州郭藥師以燕山叛降金金盡陷燕
山州縣

初郭藥師與詹度同職自以節鉞欲居度上度以御筆所書有序藥師不從加以常勝軍橫暴藥師右之度不能制朝廷慮其交惡命蔡靖代度靖至坦懷待之藥師亦重靖稍為損抑及安中被召靖代知府事藥師每令部曲持良械精甲貿易于他道為奇巧之物以奉權貴宦侍譽言日聞于帝遂專制一路增募兵至三十萬而不改契丹服飾朝論頗以為疑進拜太尉召之入朝藥師辭不至帝令童貫行邊陰察其

去就不然則挾之偕來貫至藥師拜迎帳下貫避之
曰汝今為大尉與我等耳此禮何為藥師曰太師父
也藥師唯拜我父焉知其他貫釋然遂邀貫視師至
于迥野畧無人迹藥師下馬當貫前棹旗一揮俄頃
四山鐵騎輝日莫測其數貫衆皆失色歸為帝言藥
師必能禦敵蔡攸亦從中力主之謂其可倚故內地
不復防制屢有告變及得其通金國書朝廷輒不省
詹度又言藥師瞻視非常趣向懷異逆節已萌凶橫
日甚始詔遣官究實而金兵已南下幹里雅布自平
州破檀薊至三河蔡靖遣藥師及張令徽劉舜仁帥
師四萬五千迎戰于白河兵敗而還藥師遂帥所部
兵劫靖及郡轉運使呂頤浩以降幹里雅布執靖頤
浩置軍中以行于是燕山府所屬州縣皆為金有幹
里雅布得藥師益知宋虛實因以為鄉導懸軍深入
矣

發明

入者逆而不順之辭所以抑強敵也叛者作亂悖逆之辭所以討有罪也嘗觀信任叛亡

之君未始不為叛亡所誤漢武之信江充而父子之情乖梁武之信侯景而君臣之義廢藥師遼之叛將宋射一時之利委以腹心之托加官賜予言聽計從雖聞間言無復深慮殊不知于殺張毅之時叛意已萌矣而乃畀之節鉞寄之全燕謂之何哉然藥師所歸者惟涿易二州而併失全燕之地雖欲悔之其可及乎自藥師叛降金人備知虛實而懸軍深入矣綱目直書君臣交罪之也

廣義

嗚呼人之死也死于心腹受病者常多死于四體不仁者常少何也蓋四體不仁容或可

以少瘥若夫心腹者軀命所關苟或受病日深則中必崩潰雖俞扁莫能愈焉奸人誤國何以異于是哉若郭藥師者崩潰心腹喪身之惡疾也觀其在遼則叛遼而降宋在宋則叛宋而降金當夫邀

貫視師之日揮衆一集明示欲叛夫何童貫昏愚
不察反以其能禦敵而遣之邪彼其敗績于白河
者乃藥師之詐也不然獨降于金可矣何以執蔡
靖同降哉是役也不以藥師禦敵則宋金勝負未
可知也噫當藥師降宋之時遼之腹心被其崩潰
而死宋之腹心已受其病特其病之尚穉未足以
殺其軀命耳至此降金則宋之心腹崩潰而其身
于是乎死焉然則是疾也如是之毒而卻之之術
何居曰不縱欲不貪求親
賢遠佞養吾元氣而已

罷花石綱及內外製造局○詔內侍梁方平帥衛士守
黎陽

帝以金人南下悉以禁旅付內侍威武軍節度使梁
方平守黎陽步軍都軍候何灌謂白時中曰金人傾

國遠至其鋒不可當今方平掃精兵以北在京皆疲弱也萬一方平不板梧何以善吾後盍留以衛根本

不從

發明

金人南寇勢益猖獗為未計者誠宜亟求備禦之策益嚴出入之防選猛將訪謀臣分守

要害以遏敵衝必如師之丈人始得吉而无咎方平無知闔人之以供灑掃之役則有餘以之任將帥之職則不足易曰負且乘致寇至以小人而乘君子之器盜斯奪之矣徽宗信任童貫卒以覆國矧一童貫未去一童貫復用者哉他時師潰黎陽金人深入京師不保中原隨陷龍用闔人果何益邪此徽宗所以終于敗亡而不悟也直書于冊失自見矣

廣義

書詔內侍梁方平者譏其蹈童貫之覆轍也

以皇太子為開封牧

帝以金師日迫為憂蔡攸探知帝意欲內禪引給事中吳敏入對宰執皆在敏前奏事且曰金人渝盟舉兵犯順陛下何以待之帝默然曰奈何時東幸計已決命李稅先出守金陵敏退詣都堂言曰朝廷便為棄京師計何理也此命果行須死不奉詔宰執以為言稅遂罷行而以太子為開封牧

詔天下勤王許臣庶直言極諫罷道官及行幸諸局

初宇文虛中為童貫參議官虛中以廟謨失策主帥非人將有納侮自焚之禍上書極言之王黼大怒又累建防邊策議皆不報及金人南下貫與虛中還朝帝謂虛中曰王黼不用卿言今事勢若此奈何虛中對曰今日宜先降詔罪已更革弊端俾人心天意回則備禦之事將帥可以任之帝即命虛中草詔畧曰

朕以寡昧之質藉盈成之業言路壅蔽面諛日聞恩倖持權貪饕得志縉紳賢能陷于黨籍政事興廢拘于紀年賦歛竭生民之財戎役困軍旅之力多作無益侈靡成風利源酷權已盡而年利者尚肆誅求諸軍衣糧不時而冗食者坐享富貴災異譴見而朕不寤衆庶怨懟而朕不知追惟已愆悔之何及思得奇策庶解大紛望四海勤王之師宣二邊禦敵之畧永念累聖仁厚之德涵養天下百年之餘豈無四方忠義之人來徇國家一日之急應天下方鎮郡縣守令各率衆勤王能立奇功者並優加獎異草澤異材能為國家建大計或出使疆外者並不次任用中外臣庶並許直言極諫帝覽之曰今日不吝改過可便施行虛中又請出宮人罷道官及大晟府行幸局暨諸局務

發明

與治同道罔不興與亂同事罔不亡徽宗明仁之君固當剗革弊政期抵太平矣自崇寧

初年侈心一動喜佞樂諛黜忠彥而用蔡京于是
塞言路斥正人興大獄事邊功窮聚斂縱奢侈溺
聲色盜游逸事神怪凡亡國敗家之事靡一不舉
重以童貫王黼之徒交扇其禍天下雖欲不亂不
可得也向使金不入寇則是荒淫之君可以長享
福祚而奸邪誤國之徒亦可以長保無虞矣上天
降罰變起幽燕四海分崩兩河覆沒凡前日媒亂
之事次第革罷深自追悔然後知治忽所繫毫杪
不差而小人得志未有不反其初者綱目于金人
入寇書之甚輕則見其為寇已久畧無預防之意
至于徽宗禦侮之事則書詔內侍梁方平帥師守
黎陽詔天下勤王用見武備之弛至命宦者為將
至召天下之兵其為後王
鑒豈不深切著明也哉

廣義

分注載帝命宇文虛中草詔罪已何其自責
之明且切哉或曰漢武帝之輪臺唐德宗之

奉天皆罪已也二君之國何以不亡而徽宗獨亡乎曰三君之詔名同而實異者也何以言之蓋武帝德宗有亡國之事而無亡國之臣故也觀夫武帝之時如田鴻臚之明見霍子孟之孤忠李廣利之將畧輔弼者多諛佞者少當時聚斂如桑弘羊言者欲烹況乎盜賊雖多終不如金人之強武帝奚其亡德宗之世如陸敬輿之忠鯁李常侍之啓沃李西平之忠勇奉公者多徇私者少當時欺罔如裴延齡論者不置又況吐蕃雖強亦不如金人之盛德宗奚其亡徽宗則不然耳侈靡過武帝括財浮德宗蔡京王黼等諂佞于內童貫方平等典兵于外其視武帝德宗之臣奚翅孰優而孰劣孰得而孰失乎羣小在朝衆臣在野阿諛者為順旨姦回者為忠直凡百所為其有戾于武帝德宗也多矣又況金人強盛實非徽宗之才可以禦之也其詔雖曰罪

已要亦噬臍無及
矣徽宗宜其亡

詔熙河經畧使姚古秦鳳經畧使种師中將兵入援

時欲召古師中令以本路兵會鄭洛外援河陽內衛
京師帝命宇文虛中為河北河東路宣護使護其軍
虛中以檄召古師中兵
馬令直赴汴京應援

發明

時金人憑陵君父蒙難此正臣子捐軀報國
倡義勤王之秋也夫何古等既擁強兵坐視
不救必待詔趨然後入援義者必急
其君豈若是哉直書曰召蓋譏之也

以吳敏為門下侍郎

帝東幸之意益決太常少卿李綱謂敏曰建牧之議
豈非欲委太子以留守之任乎今敵勢猖獗非傳太

子以位號不足以招徠天下豪傑敏曰監國可乎綱曰肅宗靈武之事不建號不足以復邦而建號之議不出于明皇後惜之上聰明仁恕公曷不為上言之翌日敏入對具以綱言白帝帝即召綱入議綱刺臂血上疏曰皇太子監國禮之常也今大敵入攻安危存亡在呼吸間猶守常禮可乎名分不正而當大權何以號召天下若假皇太子以位號使為陛下守宗社收將士心以死捍敵天下可保帝意遂決明日宰臣奏事帝畱李邦彥語敏綱所言遂拜敏門下侍郎即草詔傳位焉

廣義

嗚呼忠臣義士無世無之願人君用舍何如耳觀夫徽宗之時親近者莫如童貫蔡京王黼

陳遼者無如吳敏李綱當童貫蔡京王黼明行妄作之時徽宗不識吳敏李綱何如人物也然而披露忠肝義膽于國步艱難之秋不在于親近之童貫蔡京王黼而在于向義排難之吳敏李綱其

人品之賢不肖有如是夫
君人者不可不慎其用舍

帝傳位于太子太子即位尊帝為教主道君太上皇帝
皇后為太上皇后

帝下詔禪位太子自稱曰道君皇帝太子入禁中被
服涕泣固辭不許遂即位尊帝為教主道君太上皇
帝退居龍德宮以李邦彥為
龍德宮使祭攸吳敏副之

發明

徽宗傳位太子此固一時權宜異于唐之立
宗矣然即位二紀窮極奢淫國事怠荒四海

鼎沸及其金革彌興心喪膽落縮首無策傳位太
子嗚呼徽宗享逸樂于平時懼危亡于亂世烏足
謂之中人以上者乎迨至太子嗣位尊為教主道
君以萬乘之尊為道教之主至于沒齒而尚不悛

善乎劉文安公曰今日為教主道君皇帝于宋何其尊也以此欺愚眩衆不自知他日封為昏德公于金而不勝卑辱矣可勝嘆哉
綱目據事直書所以深譏之爾

廣義

臣聞以道化天下者曰皇伏羲神農黃帝是也

是也道與德非有二皇與帝其理同然而名號之殊者乃後人尊稱之異耳亦非當時數聖人自稱之也至秦呂政自謂功過三皇德兼五帝故總自稱為始皇帝云以明道德皆萃于其身故也何其不知量哉後世臣子遂因襲之皆稱其君父曰皇帝如呂刑稱舜者此皆尊敬君父之盛心夫何足怪故魯君侯爵孔子以公稱之尊君父也聖人尚爾況去聖人之萬萬者哉今徽宗自稱為道君皇帝者臣知其所謂道者惟是靈素之道豈皇帝之道邪至其厥子猶弗知悟又尊以教主之名且彼

所謂教者亦以靈素之道為教而又非以皇帝之道為教也厥後父子得號昏德重昏者不亦宜乎

以李綱為兵部侍郎

綱上書言方今中國勢弱君子道消法度紀綱蕩然無統陛下履位之初當上應天心下順人欲攘除外患使中國之勢尊誅鋤內奸使君子之道長以副道君皇帝付託之意召對延和殿時金議割地綱言祖宗疆土當以死守不可以尺寸與人帝嘉納之拜兵部侍郎

廣義

嗚呼李公之言何其剛正明白誠嗣王新服厥命之藥石也使徽宗預用李公又何至于

今日之顛沛乎書稱知人之難信矣哉

赦○立皇后朱氏

后武康節度
使伯材之女

以耿南仲簽書樞密院事

南仲帝東

宮舊僚也

遣給事中李鄴使金

告內禪請修好鄴至慶源府幹里惟布欲還
郭樂師曰南朝未必有備不如姑行從之

廣義

汴宋之亡亡于叛臣郭樂師之一言
耳孔子曰一言而可以喪邦其然乎

太學生陳東上書請誅蔡京等六人

時天下皆知蔡京等誤國而用事者多受其薦引莫
肯為帝明言之東率諸生上書曰今日之事蔡京壞

亂于前梁師成陰賊于內李彥結怨于西北朱勔聚怨于東南王黼童貫又從而結怨于二敵創開邊隙使天下勢危如絲髮此六賊者異名同罪伏願陛下擒此六賊肆諸市朝傳首四方以謝天下

發明

陳東請誅六人而必以蔡京為首者討首惡也京等蠹君疲國結怨天下雖摧髮不足以

數其罪也外患之來非京等有以啓之乎王氏濬曰事君之道苟利社稷死生以之若顧嫌避咎此人臣不忠之利非人主社稷之福時天下已亂強敵憑陵京等享爵自如畧不之罪陳東乃太學生員初無官守之寄又無言責之託亦能上書糾劾忠憤激烈宋庭諸臣寧不為之少愧哉觀于此則東討賊之心切而憂國之心誠矣直書于冊深予之也


廣義

嗚呼陳東之言賈太傅所謂痛哭者是也欽宗即位之初一得陳東之書正當奮乾剛之

斷即以六奸肆諸市朝詔告天下將見天下之懷
忠秉義者莫不曰有君如此我可不出而輔之且
大奸脫距黨勢自孤不能為害也必矣况金人一
聞新君如此有為氣亦少沮汴宋基圖孰能搖之
今于陳東之言既嘉納之又果行足見其不能
有為也噫不能有為于其始安能有為于其終邪
書曰去邪勿疑惜乎
欽宗不足以語此



御批續資治通鑑綱目卷十



總校官候補中允 臣王燕緒

校對官編修 臣劉汝暮

謄錄監生 臣許祖燾